

光緒江西通志

江西通志卷一百四十五

列傳十二 吉安府一

漢

區謝志作歐寶平都人性至孝居父喪廬墓鄰人格虎虎投

廬中寶以蓑衣覆之鄰人尋蹟問寶寶曰虎豈有可舍

而藏之乎此虎後送禽獸以助寶祭孝慈之志通於神

明由是知名安成記謝志舊案歐寶林志以為漢人

和元年始析吉水置永豐縣舊志俱誤明一統志作安

成人安成漢縣似可從今姑仍舊志又吉水人文紀作

歐陽寶不知何據謹案太平御覽引王季安成記曰

平昌區寶者後漢人平都漢侯國本安平改今屬安福

縣淨草十代文獻略云言南北朝者時誤言歐陽寶者

姓誤又考漢安成為今安福縣地太平寰宇記載寶墓

在縣南七里可證惟永豐縣南有報恩江云以區寶放

虎得名傳流既久莫之能詳區本有歐音漢書區博區

寶事不詳今據安成記補正

江

晉

修肅廬陵人爲典書令懷帝始立爲皇太弟懼不自安肅曰二相經營王室志甯社稷儲貳之重宜歸時望親賢之舉非大王而誰清河幼弱未允衆心今乘輿播越二宮久曠宜及時登儲副帝曰卿吾宋昌也從之晉書懷帝

本紀

苻表太元中隨父徙安成年十六母姜氏有疾晝夜省

視母一食表亦一食母不食將絕表感咽而殞俄母亦

沒葬於四望岡太守爲表其墓豫章書謝志舊案林

時人謂一統志有大中開三字東晉無大中年號郭青

經謂當從舊府志作太元考舊府志無太元字又林志

以表爲明兄苻字從竹一統志郭書俱以爲明兄子皆

不知何據考晉書載記苻朗傳初不及表白志據郭書

采入姓仍之又袁字記謂表

與表者王府君樹雙玉闕云

宋

王孚安成人文帝時爲文學主簿未幾卒沈邵誄之以文稱其行潔業淳去華息競志學修道老而彌篤

林志

南齊

王虛之字文靜廬江石陽人十三喪母三十三喪父二十五年鹽酢不入口庭中楊梅樹隆冬三實每夜所居有光如燭墓上橘樹一冬再實時咸以爲孝感所致

南史

謝志舊案隋書地理志廬江無石陽而晉志石陽屬廬陵則江字當是陵字之訛再考宗躬孝子傳及豫章書以以虛之爲廬陵西昌人與史傳異白志從史訂正

匡昕字令先廬陵人有至性隱居金華山服食不與俗人交母病亡已經日昕奔還號叫母卽蘇皆以爲孝感

所致

南史解叔謙傳

隋

李孝子失其名吉水人幼喪母哀毀踰禮事父孝養惟

謹父沒未及葬比舍失火火驟至慟哭伏棺死其墓在

學宮側有司世世表封之

林志 謝志舊案周敘孝子亭記言其事父每出迺里輒

返曰吾可暫忘膝下乎父病十旬衣不解帶

王驚石陽人父喪權殯宅後宅火力不能救遂投火死

鄉人哀其孝共立墓葬之因祠祀焉

白志 謝志舊案石陽屬廬陵豫章

書謂泰和孝子自驚始不審所據明一統志不載安志入南朝邑志入南齊今從白志

唐 南唐

羅祿龍泉人爲駕部郎中從李德裕平澤潞上疏論河

朔諸藩倔強闔寺弄權數事命與令狐綯同議累官至

尚書吏部侍郎參知政事階銀青光祿大夫

林志 謝志舊案唐

書志吉州廬陵郡無龍泉縣名考寰宇記南唐保大元年析太和龍泉鄉什善鎮地置龍泉縣宋顯德七年升為縣林志以森為龍泉人者誤龍泉唐書蒲鎮傳平澤路李文饒並未親行非如裴晉公之於淮蔡也安有以駕部郎從征之事此蓋明人習見閣部者師職方武選諸郎從為監紀贊畫依倣為此語耳其為附會無疑不獨龍泉泰和之失考也又案舊志南昌列傳有唐羅泰詳略不同末云為吉州別駕遂家吉州疑本是一人也

陳岳廬陵人為南昌觀察判官著唐書自高祖至穆宗

為統紀凡一百卷行於世子睿安志仕吳為翰林學士

撰吳錄二十卷白志謹案陳岳父子豫章書凡兩載

志刪彼存此南唐書陳岳傳廬陵王簡人王謨十代文

略略攻為今臨江峽江縣地此豫章書作峽江人之所

也本羅景莊萬安人應武舉為參軍兵馬使從曾元裕追寇

黃梅大捷改招討使隸都統鄭畋元戎下巢寇殄平進

都頭行營驍騎將軍吉虔二州有警遂投救鎮撫

林志謹

案舊志均入元末豫章十代文獻略攷定為唐時人是也今改附此

江檀永新入天祐閒刺史殉節於南昌縣象牙潭江上

後人為建廟祀之

白志

賀泰前縣令憑子黃巢之亂泰將兵扞金陵賊自關陝

乘勝南下浙江將入廣泰反趨洪州邀擊之大戰象牙

潭挺身對陣賊不敢偪後以饒信諸州縣並陷遂力竭

斃於軍洪人憫之封墓江口廟祀焉詔贈武翼大夫

縣志

謝志舊案江賀死地相同安志府志唐末人物俱有江無賀白志於江檀存疑仍不錄賀泰今並采後考

彭玕唐書五代史作玕本瀛洲人四世祖雲構一作雲天寶

中遷居廬陵唐末玕雄據一方士馬精銳數與淮南爭

衡湖南馬氏為之請於後唐封安定王卒年九十八好

學不衰子弟從授二戴禮及春秋者俱千餘人

歐陽圭齋集

劉景洪永新人唐南陽太守遐之後家富好施楊行密攻江西吉州刺史彭玕屬景洪以兵脅永新附湖南景洪偽許之玕奔湖南景洪終以州歸行密及徐溫建國以禮聘景洪辭不赴嘗曰吾免二國交兵活人多矣當有興隆者故名其北山曰後隆年九十卒子煦仕南唐歸宋官至宣徽院承旨煦子素素子沆景洪與素皆以沆貴贈宰相國公

永新人物志

羅韜字洞晦廬陵人唐末隱居不仕南唐徵授長沙通判除端明殿學士不拜獻丹扆四箴禮賜金幣以歸愛匡山山水徙居之建書院於山麓事聞敕賜額匡山書院命翰林學士趙鳳爲扁題及卒門人私謚靜逸先生

玉山遺響謝志舊案羅希各志俱不載白志宋張質山庸書所載羅洞晦先生傳稱人是時學校之政未有修明共溺於詞章取其應制雖崛起以聖學為己任有宋道學之盛蓋自開先之力焉

周彬和川馬令書人杜門讀書不治產業聞烈祖鎮金陵招辟儒生彬因獻所習烈祖善之禪代之後有事南

郊彬著郊望論數千言陳前古得失上之署諸衛巡官

授大理司直出宰和川為政廉平鄉里率化秩滿邑人

詣郡乞留連任七考馬令南唐書謝志舊案白志引

泰和道遠請別置縣於和山和川之名當在此時南唐

仍而不改故彬為和川人即今泰和縣也考唐書地理

志武德五年置南平州并承新廣興東昌三縣八年州

廢省承新等縣人太和顯慶二年復析太和置承新永

新別為縣不應仍屬太和至四年又以道遠請別置縣

也唐志無和川縣名俟考又安志云彬宰本邑隋有爭訟者以理和解嗣王錫以銀章蔭授龍異之官至尚書郎
肅儼廬陵人幼舉童子科稍長為祕書省正字烈祖初

歷大理司刑部郎中元宗保大二年欲傳位於景遂儼
上書力爭其後元宗於宮中作大樓臺近臣入觀皆歎
其宏麗儼獨曰比景陽但少一井耳貶舒州副使俄召
還後主嗣位與嬖佞弈棋儼入見作色投局於地後主
詰之曰汝欲效魏徵邪儼曰臣非魏徵則陛下亦非太
宗矣後主爲罷弈南唐亡以老病歸鄉卒年七十餘

南唐書

顏詡魯郡公真卿之後唐末徙居禾川少孤事繼母以
孝聞一門百口家法嚴肅子姓二十餘人皆被服儒業
聞子弟中有與客戲者手寫韋昭博弈論署於屋壁使
之自媿家人未見其喜愠卒年七十餘

馬令南唐書
謝志舊案宏簡

錄易延慶傳後有顏詡吉州永新人其祖真卿謫廬陵
因家焉詡應入吉安前志載寓賢今更定又宋史謂乾

德元年詔卒詔旌其門改鄉名義感里名和順以詔為宋人考乾德時南唐國號尚存而詔已卒應從馬書入南唐

蕭結廬陵人為祁陽令潔己愛民志移澆俗時方暮春

州符下取船競渡結批曰秧開五葉蠶長三眠人皆忙

追划甚閒船守為罷競渡

明一統志

劉生廬陵人南唐時居閩閩中業釘鉸事母極孝母病

目二十餘年生苦心求療一日為人磨銅瓶

各志俱作餅據十代

文獻略引得異方歸以藥母母目復明

安志

魯崇範廬陵人烈祖初建學典籍多闕崇範雖窶九經

子史世藏於家刺史賈皓就取進之以己緡償其直崇

範笑曰墳典天下公器世亂藏於家世治藏於國其實

一也吾非書肆何估直以償邪皓謝曰俗吏浼濁以貽

先生羞不然何以見高義會皓赴闕與俱至金陵表薦

之授太子洗馬

馬令南唐書

謝志舊案明一統志及

會氏言行約編崇範爲宗聖四十世孫曾達臣劉醒雜志明一統志萬姓統譜吉安舊志並同乾隆間吉安志始據白志改舊志以曾爲魯今府志仍改從曾

蕭瓚字君玉泰和人性至孝仕南唐歷官國子祭酒過

家上冢適虔寇犯州境瓚率畦丁掩捕略盡沒之日鄉

人立祠祀焉

林志

陳喬字子喬廬陵玉笥人起家太常奉禮郎歷中書舍人淮南兵興元宗憂蹙不知所爲陳覺李徵古請以宋齊邱攝政召喬草詔喬排宮門入頓首曰陛下旣署此則百官朝請皆歸齊邱他日求爲田舍翁不可得矣元宗笑而止引喬入見后及諸子曰此忠臣也後主嗣位

歷吏部門下侍郎兼光政院輔政宋太祖遣使召後主
入朝喬曰往必見留如社稷何及曹彬下金陵城將陷
後主自爲降款命喬詣彬喬持款歸府投承霤中復入
見云自古無不亡之國降亦無由得全徒取辱耳請背
城一戰後主不能從喬曰如此則不如誅臣歸臣以拒
命之罪又不從乃掣手而去至政事堂召二親吏解所
服金帶與之曰善藏吾骨遂自縊二吏撤楊瘞之金陵
平家人謀改葬求尸不獲或見一丈夫衣黃半臂舉手
障面及發瘞如所見焉陸游南唐書謝志舊案喬爲廬陵人陸馬二書同宋史張洎傳附載陳喬事不言何許人人物志則南昌吉安臨江三府互載白志據史改定攷見前

郭昭慶廬陵人博學能自力嘗著唐春秋三十卷保大
中獻所作治書補揚子尉後主時復獻經國治民論擢

著作郎時方奉中朝凡歲慶賀貢方物賤表及廷勞宴

餞之辭率命昭慶為之陸游南唐書白志舊案馬令書以昭慶為禾川人豫章書以

為永新人今從陸書

劉洞廬陵人隱居廬山二十年能詩長於五字律自言

得黃岳法後主屬意詩文洞獻詩白篇不見省金陵受

圍洞猶在圍中國亡過故宮闕徘徊賦詩感慨悲傷不

以不遇而有怨懟語有夜坐詩見稱一時號劉夜坐云

陸游南唐書

郭鵬永新人南唐開科取士鵬中第為廬陵令尋轉大

理屬官與大理卿蕭儼同決疑獄案南平王鍾傳夫人

奸事人服其果斷永新人物志白志舊案劉文安公永新人物志所載多本品人閒有林

志豫章書所不載者如郭胡二人是也

胡元龜永新人少有俊才嘗候邑宰宰欲窮其所學指
屏閒戲珠龍求詩元龜援筆立就有云翻身騰白浪伸
爪攫明珠意以諷其貪也宰媿服後射策入官授文房

別史

永新人
物志

歐陽彬永豐人仕南唐爲武昌令檢校右散騎常侍兼

御史大夫性孝友鄉里稱之累贈中書令

林志

歐陽偃彬子少以文學稱南唐時獻所爲文召試爲南

京街院判官累贈中書兼尚書令

吳沖卿
撰行狀

歐陽儀彬子中南唐進士第父母皆在鄉里榮之命其

鄉曰儒林里曰歐林坊曰具慶

吳沖卿撰行狀
謝志舊案彬即文忠公之曾

祖生八男詳見吳沖卿充所撰行狀中林志以彬爲廬
陵人據行狀則永豐人也偃儀二人林志豫章書人物

志俱不載
白志采補

歐陽廣吉水人武安節度使邊鎬昏懦無斷在湖南政出多門不合眾心廣上書言鎬非將帥才必喪湖南宜別擇良帥益兵以救其敗不報已而劉言襲鎬據之唐

王思廣之言拜本縣令

林志

李續

續一作

字繼宗永新人少不事生產專志儒業嘗讀

書廬山學成游建業會宋師南攻丹陽潤州節度使盧絳辟掌記授宣教郎江南既入宋隱居不出教授鄉黨郡倅溫仲舒向敏中慕其賢皆勸之仕終不起年九十餘卒

林志

劉言吉州廬陵人初事刺史彭玕從玕奔楚事馬希範爲辰州刺史武平節度使馬光惠愚懦嗜酒王進達周行進何敬真謀以言曉勇能得眾心欲迎以爲副使言

知進達等難制曰不往將攻我乃單騎赴之既至眾廢
光惠推言權武平留後徐威變起湖南大亂李景遣邊
鎬入楚遷馬氏於金陵言使進達與行軍司馬何景真
攻鎬於長沙鎬敗走唐將守湖南諸州者相繼遁去遂
盡復馬氏嶺北故地周廣順三年奉表京師乞移治武
陵周主詔升朗州爲武平軍在武安軍上以言爲節度
使因以武安授進達進達以言爲己所迎立不爲之下
襲殺言

五代史楚世家 十國春秋 謹案劉言舊志不載今補附南唐末

宋

王克貞字守節廬陵人南唐進士歸宋授太子中允知
漢州以文學受知太宗與張洎同爲誥命典正預修太
平廣記總類歷滑襄梓三州皆有善政史臣謂優於張

洎云

林志

劉德言安福人南唐時寇亂德言率良家子弟捍闕里全活甚眾宋平江南以所統兵歸授文階仕至水部員外郎江南轉運使

林志

劉茂中安福人仕南唐以功授吉州兵馬監押累遷袁州刺史宋平江南茂中至京師太祖問曰卿在江南屢擾邊邑何也茂中對曰臣結髮事主惟忠勇是奮雖陛下親征臣亦殞身不顧太祖壯之授登州刺史

林志謝志舊

案明一統志茂中作忠烈入五代無授登州刺史事

尹承諤永新人南唐時授本邑制置兵馬監押輯睦將校兵士樂爲之用入宋授左侍禁太宗嗣位轉供奉官會計邊運事皆幹濟敕巡撫環慶還奏鄭州商稅欺弊

因命按治著爲令

林志

劉鶚字仲翔廬陵人開寶進士嘗撰法語八十一篇大略以帝王爲治之法當法聖明卿士立身之法當法聖賢多引經爲證所居號杉溪其讀書臺遺址尙存

林志

何晝永新人少讀書廬山白鹿洞宋平江南謁宋祖陳所著書二十卷開寶五年登進士第官鳳翔觀察推官以文章政事名

人物志

段鵠字正己永新人端拱進士與瑯邪王儼建陽李寅及孟歸唐等入廬山國學讀書十餘年並有時名

自志謝

志舊案段鵠前志以爲廬陵人今改正

尹絳泰和人少好學爲文師韓柳景德進士授天長簿改懷甯爲政明敏廉潔吏不能欺請託不入終衡州通

判林

歐陽觀字仲賓永豐人與弟煜同登咸平進士歷泗綿二州推官性至孝歲時祭祀考妣涕泣如初喪治獄明慎矜惻每思求其生後任泰州判官卒以子修貴封崇

國公

吉州人文紀略 謝志舊案
林志仲賓作仲實白志改正

歐陽載字則之永豐人文忠公修仲父也瀋化進士乙科真宗嘗自擇御史載以祕書丞召見見者數人皆自薦載獨立墀下無所說明曰拜監察御史中丞王嗣宗指曰是獨立墀下者真御史也遷殿中侍御史出知泗州先是京師歲旱有浮圖人斷臂禱雨官爲起寺於龜山其勢傾動四方又誘民男女投淮水死曰佛之法用此得大利而愚民歲死淮水者幾百人臨溺時用其徒

倡呼前後擁之以入至有自悔欲走者呼號不得免載
聞之驚曰害有大於此邪盡捕其徒詰其姦民誅數人
遣還鄉里者數百人遂毀其寺轉尙書司封員外郎三
司戶部判官六年爲廣南東轉運使秩滿以一敝舟還
無一海上物以足疾求知江州卒

吉州人文紀略

彭齊字舒孟吉水人大中祥符進士爲楊億所賞拔官
至太常博士真宗嘗大書殿柱云彭齊之文章楊伋之
廉謹蕭定基之政事可爲江西三瑞

林志

毛應佺字子真吉水人大中祥符進士知贛州地產多
異物宦其土者往往舳舻銜尾應佺比歸盡室一舟無

錙銖餘物歷虔韶太平通判

林志

楊伋字大中吉水人大中祥符進士授國子博士進尙

書屯田員外郎以廉謹名天下

林志

蕭定基字守一廬陵人天禧進士累官監察御史裏行

蘄州守王蒙正恃勢賂誣屬縣長死罪詔定基往治

遂正其獄除開封府判官遷侍御史宜州蠻爲寇以定

基爲廣西安撫蠻不敢動官至淮荆湖制置發運副

使卒贈兵部侍郎

林志定基

謝志舊案宋史蕭服廬陵人定基服祖林志別隸吉水今改正

歐陽騰字日華爲隨州推官治獄之難決者三十六人

奇峯寺僧以奸利致富轉運使命騰籍之僧致白金于

兩爲饋騰笑而卻之曰歲大凶汝有積穀六七萬能盡

以輸官賑民則吾不汝籍僧喜諾盡輸之饑民賴以全

活知桂陽有爭舟相毆至死者獄久不決騰出囚飲食

之獨留一人曰汝持匕以左手今死者傷在右肋此汝

殺之明矣囚卽服罪厯知黃永二州以都官員外郎致

仕

吉州人
文紀略

王贊字至之泰和人天禧進士通判信州嘗閱帳籍得
隱沒官物數百萬因條上鈎考之法著爲令召進殿中
侍御史天章閣待制兼知諫院閒因奏事退上顧左右
曰五方異稟若南土而有燕趙之氣王贊是也未幾置
天章閣直學士首以命贊英宗朝以禮部侍郎致仕神
宗卽位改戶部侍郎厯事三朝尤被仁宗眷遇

豫章書

彭思永字季長廬陵人天聖進士初知分甯境安事治
聖書褒嘉入爲侍御史極論內降官賞之弊會明堂肆
赦復抗疏論張堯佐王守忠倖進之非因罷知宣州尋
以北路轉運使平南寇有功進工刑二部郎中改益州

轉運使進戶部侍郎致仕

林志 白志舊案像章書神宗卽位御史蔣之奇糾歐陽

修陰事挽思永自助思永以爲帷薄之私非外人所知詔問語所從來思永不肯對乃出知黃州林志不載

毛洵字子仁吉州吉水人天聖進士又中拔萃科性至

孝凡守四官再以親疾解任執藥調膳嘗而後進三月

不之寢室父應佺通判太平州卒官母高繼卒於池陽

舟次持鍤荷土以爲墳手胝面黔親友不能識廬於墓

凡二十一月朝夕哭踊食裁脫粟諸生請問經義對之

流涕未嘗言文抱疾歸數日而卒郡以孝聞賜其家帛

五十疋米五十斛兄溥字文祖亦以哀毀卒於舟中

宋史

蔣黃字國華龍泉人天聖進士通判廣信軍有心計嘗

募江南船匠造鎖楸船人工物料比舊減省而可以興

漕運之利杜侵欺之奸歐陽修奏取其法行之黃通知

利病之源與度支判田況議處出入之數況乃爲皇祐會計錄上之後召爲三司鹽鐵判官

林志

郭佺舊名僅泰和人與子之美同登景祐進士名冠於朝時永豐董洙父子亦同科進士里諺云董洙三父子郭僅兩爺兒佺終河南運判贈太常博士

豫章書

郭之美佺子官至屯田員外郎通判定國軍編修國史遷集賢學士故有讀書臺在層谿上今尙存

豫章書

王億字昌齡贇子以廕當得官辭以待族人之貧者贇賢而許之皇祐中以別頭進士中甲科仁宗見其狀貌偉異顧宋庠曰甚似王贇知酸棗縣除簽書吉州判官事贇旣歸老億得請知袁州以最績聞官至職方員外

郎

豫章書

蕭汝諧字君俞定基子以父任補祕書省校書郎登慶
厯第監廣州市舶歲入增百萬彭思永薦其可任臺諫

熙甯初輪對十事皆得大體子服別有傳豫章書

蕭汝士字君平定基子以父任補官知長汀縣時方行
青苗助役法置提舉按行郡縣盡責民所有輸錢於官
又歲以數萬緡籍縣之富豪者貧民則不與汝士曰助
役之設以民力不均故因貧富以賦財縣有五等版籍
在可按而行之青苗之法以新陳不繼下戶不能自食
則利權盡歸富人故令得貸於公儲粟以俟其求可也
奈何反病之乎提舉變色曰子欲阻新法乎汝士曰今
議法非阻法也力求罷去豫章書

歐陽修字永叔吉州永豐人四歲而孤母鄭氏親教修

讀家貧至以荻畫地學書比舉進士試國子監禮部皆
第一遂中甲科以文章名天下景祐初爲館閣校勘范
仲淹爲宰相呂夷簡所惡由開封斥知饒州諫官高若
訥詆訕仲淹以爲當黜修以書責若訥謂其不復知人
閒有廉恥事若訥以閒謫夷陵令仲淹帥陝西辟修掌
書記修曰吾論范公豈以爲利哉同其退不同其進可
也辭不就慶厯初召還知諫院改右正言知制誥故事
知制誥必試仁宗知修之文有旨不試是時二府相繼
罷去當局持論者惡修異己又以其善言情狀益忌之
尋出知滁州徙揚潁二州留守南京以母憂去旣免喪
入見鬚髮盡白留刊修唐書書成拜禮部侍郎兼翰林
學士在翰林凡八年知無不言嘉祐五年爲樞密副使

明年參知政事在兵府與曾公亮考天下兵數凡邊防
久缺屯戍者必加蒐補在政府與韓琦同心輔政時東
宮猶未定與琦等協定大議神宗卽位遷尙書左丞力
求退除觀文學士知亳州青州時諸路散青苗錢修乞
令民止納本錢以示不爲利罷提舉官聽民以願請不
報乞知蔡州力求致仕修嘗守潁樂其風土因卜居焉
自號六一居士居潁一年而卒贈太子太師謚文忠所
著唐書本紀表志又自撰五代史易童子問三卷詩本
義十四卷居士集五十卷內外制奏議四六集又四十
餘卷

四朝國史傳

謝志舊案前志據東都事略以文忠爲廬陵人考公自序譜云祖居沙溪後分吉水置

永豐縣

沙溪分屬永豐今譜雖著廬陵實爲吉州永豐人謹案今永豐縣境有沙谿表石具存韓魏公歐陽

文忠墓

碑亦稱修永豐人二事尤足以證

曾朝陽永豐人慶厯開登第爲石首令改忠州弟篚同登第爲南安簿升龍南令俗尙巫鬼篚嚴令禁止調信州判官移知玉山宋庠唐介司馬光富弼趙抃皆薦篚才可館閣未及用而卒朝陽孫元忠大觀開登第所著有春秋厯法論語解周易解等書門人私謚文節先生

豫章書

蕭汝爲字叔展吉水人四與鄉薦三作榜首時人號青錢解元丁父憂廬墓手植松柏數百株郡以孝廉聞子公敞紹聖進士奉母至孝鄉黨稱蕭孝廉有子云

林志

劉沆字仲之吉州永新人祖照

謝志誤作照

父素以財雄鄉

里所居後隆山有唐牛僧孺讀書堂故址沆母夢牛相公來而生沆以進士起家爲大理評事稍遷太常丞直

集賢院擢右正言知制誥陝西用兵沆見執政白事極言得失執政不悅曰須舍人作相自行之沆曰宰相豈有常哉時來則爲之耳改知江甯厯開封府皇祐三年擢參知政事拜同中書門下平章事明年以觀文大學士出知應天府徙陳州卒元豐三年贈太師充國公東都事略

歐陽穎字孝叔永豐人登進士及第官至尙書職方郎中厯知岳閬饒等州政務嚴明有威惠年七十三卒前志李嵩字彥良吉水人與弟衡字平國生同乳二歲喪母十歲喪父兄弟每以不逮事親爲恨政和中改葬其母於廬山負土成墳廬於墓左未幾廬所產木一本兩幹高丈許復合於一至其末乃分兩幹五枝鄉人以爲瑞

宋史

楊芾字文卿吉水人性至孝歸必市酒肉以奉二親未嘗及妻子紹興五年大饑爲親負米百里外遇盜奪之不與盜欲兵之芾慟哭曰吾爲親負米不食三日矣幸哀我盜義而釋之

宋史

梁材字勁節龍泉人弱冠有文名嘗應詔上書規切時政當事者惡其語直罷歸尤工樂府胡銓王庭珪俱極推之以爲李賀復生族孫文惟正用瑋皆以雄才博學卓冠一時人稱吉州三鳳

府志

劉瑾字元忠吉州人沆之子第進士爲館閣校勘沆亡得褒贈知制誥張環草詞語涉譏貶瑾泣涕衰經詣宰相自言朝廷爲改書命黜環爲州瑾亦坐經服入公門

罷職沒喪不就官乞守墳墓王素爲請以申孝子之志
詔復職遷集賢校理通判睢州爲淮南轉運副使召修
起居注加史館修撰河北轉運使拜天章閣待制知瀛
州改鎮廣州與樞密院論戍兵不合改虔州知江州
秦州成德軍卒瑾素有操尙所莅以能稱

宋史

嚴震一名宣泰和人慶厯進士任常州推官嘗充考試
官識名士錢公輔於糊名易書中人服其藻鑑嘗與王
岐公珪同場屋珪高其議論密爲延譽爲人持身端潔
在官以薄自奉推所餘以給族之貧者

林志

毛君卿字公弼吉水人慶厯童子科執政薦其才上殿
敷奏六事皆合上意除知建昌軍官至中議大夫

人物志

胡衍字昭叔泰和人慶厯進士宰真陽嶺南無田之民

例輸身丁米衍爲言於外臺部使以聞適陳執中秉政陳知梧州時亦嘗奏及此梧人得免至是朝廷以前例可其奏衍性坦率內外洞徹所至以循良稱

人物志

歐陽發字伯和修之子少師胡安定瑗盡傳其古樂鍾律之說不治科舉業蘇軾謂其得文忠之學蓋漢伯喈晉茂先之徒以父廕官至大理寺丞所著有古今系譜圖宋朝二府年表錄

林志

歐陽棐字叔弼以父修蔭守祕書省正字及長舉進士章惇入相以祕閣校理知襄州元符三年還朝爲吏部郎中請外以直祕閣知蔡州係元祐籍鐫秩罷初修以道德文章爲三朝所知學士大夫人皆師尊之棐亦能以文學世其家有文集二十卷其他著述又五十餘卷

東都
事略

譚觀光字元賓永新人性至孝居喪廬墓有白兔白鹿
之異政和進士其弟觀復子孚先觀成子紹先皆以孝
聞後子孫繁盛宋末文信國勤王郡人從之者三族卽
張綱顏詡與觀光之裔也

永新人
物志

蔣概字康叔黃之子皇祐進士宰巴東日與周濂溪游

治平閒京師大水上游推本洪範極言朝政闕失

林
志

嚴顥字威卿吉水人皇祐進士爲河源令持身以廉邑

人惜其去餞以海錯舟行十里餘家人發缶得黃金以

告顥亟命停舟召餽者還之

林
志

吳瓘字伯玉永新人皇祐進士家居縣南連岡闔門數

百口以孝弟稱蘇軾薦爲檢討除徐州通判

林
志

蕭世京字昌孺龍泉人嘉祐進士爲廣東路提舉常平公事蔡京爲戶部尙書平章事矜己自任世京多與之忤因舉奏十事京由是銜之罷歸會徽宗於禁中得世京所上書卽擢爲吏部員外郎賜金紫

人物志

蕭佐字公弼龍泉人嘉祐進士歷宰四邑遷知汀州在信豐爲郡守劉彝所知彝執其手曰君志欲靖民真儒者事業也論薦之汀鮮儒士庠序僅有存者佐闢而新之又斥公田以供廩餼文風丕振

休志

蕭世範字治藩龍泉人嘉祐進士爲南雄推官憫運夫之苦始制小車以代之一車可勝數人之載公私稱便改廣西轉運判官以恩信示蠻獠蠻亦悅信之

林志

郭知章字明叔龍泉人治平進士敷歷邑州俱有政績

入爲殿中侍御史遷右司諫契丹遣使爲夏人勸和河西事以知章報聘詞婉而氣直官至翰林學士後以元祐名人落職奉祠

人物志

蕭渤吉州人皇祐中以殿中丞知南雄州精於吏事處煩劇有餘暇儂智高寇報至急築斗城以備之民得無恐在事三年庶政畢舉及代攀留不可相與建祠祀焉

廣東通志

蕭服字昭甫廬陵人舉進士調望江令治以教化爲本移知高安縣尉獲囚盜獄具矣服審其辭疑之且視其刀室不與刃合頃之而殺人者得囚蓋平民也徙知康州改親賢宅教授入對論人主聽言之要纚纚數百言徽宗謂有爭臣風奉詔作崇甯備官記帝稱善語輔臣

曰服文辭勁麗宜居翰苑朕愛其鯁諤顧諫官何可缺此人張商英當國引為吏部員外郎以父老請蘄州

宋史

自志舊案蕭服汝諸之子定基之孫林志以爲吉水人名說

羅審理字安行龍泉人進士宰太康疏濬康溝溉田萬餘畝歲饑發倉賑貸春大雪募民貿易柴炭增其市估所全活以萬計詔使行視最書方上而卒邑民悲之則錢五十萬其子辭不受

林志謝志舊案前志有董敦逸傳據東都事略敦逸在言路

指斥蘇氏兄弟涉於傾危不應列入今削

劉顯字微之吉水人元豐進士為光祿主簿曾布當國顯為甥壻恬退自持後布貶顯得免倅虔州時甘露降於治廨之松者三憲使張景修為立仁澤堂作詩記之

林志

彭涓字道源廬陵人歷守康賀二州所至有惠政嘗上

書譏切王氏之學

林志

段子沖字叔謙廬陵人自少力學不倦築小齋藏書數萬卷無復嚮用意郡以遺逸八行舉固辭不就自號潛

叟

林志

劉弇字偉明吉州安福人兒時警穎日誦萬餘言元豐進士繼中博學宏詞科知嘉州峨眉縣改太常博士元祐中有事於南郊進南郊大禮賦哲宗覽之以爲相如子雲復出除祕書省正字徽宗卽位改著作佐郎實錄檢討官以疾卒弇性不事拘檢爲文剷剔瑕類卓詭不凡有龍雲集三十卷周必大序其文謂廬陵自歐陽文忠以文章續韓文公正傳爲一代儒宗繼之者弇也其

相推重如此

宋史

彭瑜字君玉吉州安福人熙甯閒失其母瑜朝夕焚香
祈天願知母所在如是十餘年俄有人言母爲泰和倪
氏婦瑜竟迎以歸

宋史

張翔字陞卿更名庠字元道永新人嘗著斥蠹正言二
書以排佛老作元經圖以明五行六度之祕鄭獬吳處
厚錢明遜咸質款焉號白雲先生

永新人
物志

曾肅字溫夫泰和人性純孝居父喪廬墓側有慈烏來
巢之祥黃庭堅知泰和時嘉其行稱爲清高處士云

朴志

左書言永新人元豐進士授鄧州教授嘗括廢田三千
頃以膳生徒翼宇一新經術大明

永新人
物志

高文中字景通吉水人元豐進士任南安參軍郡大水

公私廬舍多仆文中急開獄縱囚諭之曰汝之罪有死
有不死不幸獄壓則均死矣水退當復至翌日水退無
一人亡者後知邵州尤多遺愛

豫章書

郭知微字介卿龍泉人元豐進士授桂陽令三年無警
去官民常思之後峒民嘯聚當路撫之曰使郭知微再
來吾卽歸附時知微已卒遺其子登仕郎獬至峒民乃
散

林志

楊存字正叟吉水人元豐進士知仁和縣有尼挾時宰
勢欲強取寺外民地府守謂存曰此宰相意也從之必
見德存曰三尺之法人所與天下共也由宰相亂之
不可卒不與官終中奉大夫

林志

王端禮字懋甫吉水人元祐進士任富川令政皆行其

所學平居慕濂洛慨然以道自任所著有強仕藁論語

解易解疑獄集子鴻舉字南賓亦以文名著

豫章

葛敏修字聖功廬陵人元祐三年試禮部蘇轍知貢舉

奇其文擢高等仕爲確山令未幾罷敏修爲人孝友兄

敏求敏明連喪慟悼不勝發疾而卒有道岷集三十卷

胡忠簡爲之序初宰確山以元符上書被禁錮時論多

之

吉州人文紀略 自志舊案周益公葛聖功文集序云元祐三年東坡知貢舉奉議郎葛公奏名第七據

此則敏修乃東坡門下士非穎濱也

梁俊字克端龍泉人進士南安推官廉明多所興除民

有繼母欲殺害前母子走免訴於官有司莫能窮俊鞠

之緩其獄誘以善言使自悔母果服慈愛如己出子亦

盡孝養事聞上曰非卿燭理明無以活百姓也擢侍御

史兄偉元豐八年進士信豐主簿孫岳建炎二年進士

虔州司理俱峻風采所至稱治焉

三華集

張汝明字祖舜泰和人元祐進士初任司諫有直聲時
蔡京蔡卞當國汝明上疏劾奏謂文武兩權盡出兄弟
之手臣竊危之徽宗召拜御史後知岳州性至孝父病
瘍刺血和藥既葬廬墓側母喪病羸行踣夢父授以服
南星法用之乃愈

人物志

段贊字仲實廬陵人元祐進士任南安主簿時蘇轍監
高安稅一見異之日與論文手爲校正國語等書文名

益著

林志

王庭彥字英臣廬陵人元祐閒知尤溪賦性明敏力鉏
强悍邑人王象爲郡都吏豪猾不輸官稅庭彥謁郡退

卽館呼象至示以斷案杖之趨郡庭請罪時郡守蕭伯儀亦器重之庭彥能聲遠播監司有疑獄悉委決之漕使陳宗過境不入留詩拏洋驛云畚田高下趁春耕野水涓涓照眼明孰道深山最深處人人解說長官清

尤溪

縣志

王庭老廬陵人紹聖鄉舉官嶺南徽宗開辟雍制先聖冕服博議無準廷臣具薦庭老於是自賓州驛召至爲禮制局檢討

人物志

劉鼎臣字和之泰和人紹聖進士以大庾主簿攝吉水尉上書言十事用事者惡其切直以元祐指名禁錮累年遇八寶赦授零都令終南安知錄

林志

艾君瑜永豐人性至孝母疾革刲股和藥以進病果愈

母喪廬墓崇甯中郡守以聞詔復其家

林志

曾安強字南夫泰和人登乙科調舒州法曹後提舉成都路常平至則民訴旱決灌口水以灌田歲因大穰士民刻石江上號均水記先是廬肆多火無以瀦水安強按地爲溝三百所或病之俄得斷碑乃張詠疏渠積水記中一一如所經畫時朝廷遣中人督上供帛有鄧述者挾持尤甚市物不中意輒焚燬安強疏其事徽宗斥述不用會戶部議糴東南粟百萬顧左右未知所對上曰曾安強可遂除河南常平居七月卽罷卒於家初安強與兄安止安中皆擢第郭知章挽其母劉詩曰一門十捧鄉老書四子五折東堂桂西昌科目之盛曾爲稱

首云

吉州人
文紀略

李穀字頤正龍泉人紹聖進士歷高安令有重囚三十
二人其二已死於獄蓋尉欲希賞以盜誣之也穀將直
之尉喉被盜者告州旬日獲真盜於宜黃錄囚辭以報
三十人皆免

林志

嚴執中字子權泰和人元符鄉舉任新建主簿丞相趙
鼎參政李光見其議論文采力薦之執中請老益堅既
得謝放意文字箋經勘史不釋手里中士游其門者多
爲聞人

林志

蕭楚字子荆泰和人元符鄉舉其學以窮經爲本尤深
於春秋著經辨四十九篇會蔡京方貴盛楚遺書馮獬
謂蔡必召亂誓不復仕隱居三顧山下築讀書臺胡銓
楚之門人登進士歸拜牀下楚曰身可殺學不可辱無

禍吾春秋銓議論懇切卓然爲天下名臣楚與有力焉

門人私謚曰清節先生

林志

朱蒙聖字聖功吉水人崇甯進士當路交薦以親老辭
授豫章糾曹以歸中途聞母訃冒暑奔赴毀瘠而卒

豫章書

歐陽珣字全美吉州廬陵人崇甯進士調忠州學教授
南安軍司錄知鹽官縣以薦上京師遇國難及出使加
將作監丞金人犯京師朝議割河北絳磁深三鎮地講
和珣率其友九人上書極言祖宗之地尺寸不可以與
人及事急會羣臣議珣復抗論當與力戰戰敗而失其
地他日取之直不戰而割其地他日取之曲時宰怒欲
殺珣迺遣珣奉使割深州珣至深州城下慟哭謂城上

人曰朝廷為姦臣所誤至此吾已辦一死來矣汝等宜

勉為忠義報國金人怒執送燕焚死之宋史白志舊案監丞既被難

朝錄其忠無子自其塔曾敏恭史傳未載

劉琮字粹老吉水人大觀進士歷仕諸王宮翊善金人

議立張邦昌使范瓊以兵脅在城百官勸進琮自服利

藥疾勢委頓使至門見琮不能支乃不果偪邦昌大為

之愧有文學平生著述甚多林志

孫叔通字深道龍泉人初以薦至京因星變陳言請開

黨禁召用舊人忤蔡京以歸政和二年中進士第歷官

清海節度推官時方禁史學士至有不知魏晉者叔通

儲書萬卷歷代興廢治亂得失叩之響應時號孫書庫

林志

郭允升

元升一作

字彥信泰和人政和進士宰零陵時蠻獠

擾民允升下車未久咸服其化而馭吏尤嚴政知安化

縣多虎害有父子死於虎者允升莅政虎皆遁去

林志

郭孝友字次仲龍泉人政和進士任國子司業時蔡京再相天下益多事孝友因奏對燕雲事當國有不悅者計謫瑞金後提點兩廣東西路刑獄捐騶從躬親按厯貪酷守令劾奏不宥累官工部侍郎秦檜與金人約和廷議多不合檜以孝友同舍生冀其附己孝友曰議和本非至計因遂銷兵如後患何士大夫豈好生事者願審思之檜不懌曰次仲亦爾邪以敷文閣待制致仕

林志

楊邦乂字晞稷吉州吉水人以舍選登進士第遭時多艱每以節義自許厯知溧陽縣會叛卒周德據府城殺

官吏邦又立縣獄囚趙明於庭欲誅之因諭之曰爾悉里中豪傑誠能集爾徒爲邑人誅賊不惟宥罪當上功昇爵明卽請行邦又飲之卮酒使討平之建炎三年金人至江上高宗如浙西留右僕射杜充爲御營使金人偪城時李梈以戶部尙書董軍餉陳邦光以顯謨閣直學士守建康皆具降狀逆之十里亭金帥完顏宗弼旣入城梈邦光率官屬迎拜惟邦又不屈膝以血大書衣裾曰甯作趙氏鬼不爲他邦臣翼日宗弼等與梈邦光宴堂上立邦又於庭邦又叱梈邦光曰天子以若扞城敵至不能抗更與共宴樂尙有面目見我乎有劉國練者以幅紙書死活二字示之邦又奮筆書死字金人相顧動色然未敢害也已而宗弼再引邦又邦又遙望大

罵宗弼大怒殺之剖取其心年四十四事聞贈直祕閣
賜廟褒忠謚忠襄官其四子邦乂之被囚也有陳泰伯
在旁不去邦乂罵宗弼泰伯亦舉臂擊之遂同死又有
賈山郎者亦同時被執山郎陰命其子結里人爲鬻茅
者置兵於茅以入事覺父子並磔於市又有楊再興痛
主之死誓必報仇投岳飛帳下敵至力戰陷陣死獲其
尸焚焉得箭鏃二升朝廷聞之皆官其一子邦人肖其
像從祀云宋史 白志 舊案陳泰伯以下三人里居未
詳史家牽連書之今亦不復刪去 謹案宋
史楊邦乂傳並未附
陳泰伯等白志詳

楊祀字元卿吉水人政和進士始與兄邦乂同讀書每
相勵曰爵祿不必力取當力取名節耳邦乂死節祀宰
貴池經理其家而收恤其孤以歸人皆歎曰兄忠於君

弟忠於兄

人物志

白志舊案楊祀林志作杞未詳孰是

劉在中字伯正泰和人政和進士報捷日在中方鋤圃聞之弛笠謝恩雖衣冠儼飾而笠繫之痕猶宛然可見

其瀉篤如此官永州錄事參軍

人物志

李發字秀實吉水人重和舉特恩赴集英試補鼎州司理參軍攝黃陂令調零陵正豪民猾吏欺隱田糧二萬五千餘畝移永興通判橫州攝守於賓廣俗謗民童男女易翠羽於蠻一丁值二羽半歲掠買至數百人多烹以祭鬼發奏請禁之高宗惻然命焚翠羽自是無敢有以人易羽者胡忠簡銓稱其長於吏事三爲邑五典郡皆遐方餘地未究其才

吉州人文紀略

嚴彥博字文益泰和人居鄉以德義稱博極羣書雅好

修煉著內外丹圖訣政和間詔求遺書使者聞其名卽
所居訪焉見其童顏翠葆知必有所養與語奇之遂狀
其道術並所著圖訣上之自號葆真居士

林志

王庭珪字民瞻安福人以貢入太學時方禁士人說詩
庭珪獨吟詠自若中政和進士任茶陵丞忤部使者拂
衣歸胡銓上封事忤檜謫嶺表親舊無敢通問庭珪獨
送以詩坐謫訕流辰陽孝宗初召對賜坐勞問除直祕
閣一子扶掖上殿亦予官卒年九十餘所著有瀘溪集
楊誠齋爲之序

吉州正氣錄

自志舊案吉州人文紀

改正又案胡忠簡謫官時有寺丞陳剛中以啟賀之云
身爲南海之行名若泰山之重知無不言願請尙方之
劔不遇故去聊乘下澤之車亦坐貶安遠庭珪晚年再
召而剛中竟死於貶所無子其妻削髮爲尼同時同事
幸不幸

如此

劉章字微之廬陵人領鄉貢不第上書言時事不忌權貴蔡京用事籍章名爲邪黨宣和三年始以免解登進

士人物志

劉才邵字美中吉州廬陵人宣和二年中宏詞科遷司農寺丞校書郎以親老歸侍居閒十年御史中丞廖剛薦之召見遷祕書丞歷吏部員外郎典右選事先是宗室注宮觀嶽廟例須赴部遠者或難於行才邵言計經所屬以聞於部依條注擬行之而便未幾爲中書舍人兼權直學士院帝稱其能文時宰忌之出知漳州卽城東開渠十有四爲牐與斗門以瀦匯決溉田數千畝民甚德之召拜工部侍郎兼直學士院尋權吏部尙書以疾請祠才邵氣和貌恭方權臣用事之時雍容遜避以

保名節所著櫟溪居士集行世

宋史

曾民瞻字南仲永豐人宣和進士少通天文爲南昌尉置晷漏圖範金爲壺刻木爲箭壺後置四盆一斛壺之水資於盆盆之水資於斛其一注水則爲銅蚪張口吐之箭之旁爲二木偶左者晝司刻夜司點其前設鐵板每一刻一點則擊板以告右者晝司辰夜司更其前設銅鉦每一辰一更則鳴鉦以告又爲二木圖其一用木薦之以測晷景其一用水平之以法天運自謂得古人所未至

林志

尹躬字商老永新人宣和進士爲江西僉書決獄吉水有繫逋賦者十餘人男女貫於一索聞躬來密置他所躬廉知盡釋之其他異政尤多所著有易解冬官解人物

志

江陰縣志卷二 四十五 吉安府

劉獬字去邪泰和人宣和鄉舉爲衡州司法官歲饑民有窘於衣食犯法死者數十人獬請從末減太守怒碎節目擲諸地獬拾補以進守意乃釋數十人皆賴全活後爲東流令寇騎南牧東流止隔一水獬調民防江以片紙榜縣遠近胥集

林志

趙伯深字逢源安福人父子徊官棣州宣和間被檄往塞上伯深與母張留棣未幾金人渡河伯深母子相失建炎二年子徊南歸而張終未識所在伯深尋母二十餘年聞流落瀘南乃走入蜀紹興二十一年秋得見母相持號泣扶持歸以壽終

豫章書

白志舊案豫章書趙伯深字達源吉州正氣錄

作逢源周益公有跋趙逢源得母詩卷曾端伯晁子西程詠之皆有詩其爲逢源無疑

曾光庭字南卿吉水人仕爲東安簿靖康之難勒兵勤王會徽欽北狩光庭以兵趨南京列表勸進高宗旣踐祚光庭辭不受賞孫三復乾道進士歷太常少卿上疏正太祖祫祭東向位改權刑部侍郎致仕

豫章書

蕭環字國器泰和人以詩名一時靖康建炎閒嘗糾合義丁捍衛鄉里時叛將杜彥攻陷永豐縣尹趙訓之死之環往援以禮葬焉

林志

高應科安福人登童子科高宗引至便殿問曰汝童子也何爲在朕前應科對曰務引其君以當道上悅命傳送六宮賜錢絲而歸

人物志

葛深字德源廬陵人端醇詳雅貫通子史胡銓周必大互聘爲弟子師幼失怙恃依仲父緯學緯老而貧養生

送死皆深主之安於恬退故終老於鄉

林志

羅上行字元亨廬陵人建炎進士少負奇氣以功名自許時岳飛奉命討洞庭巨寇楊么檄上行督餉諸郡至全州通判范寅倨傲不與上行抗責之乃發廩帑以應知上猶境內大治部使者上其狀請頒其條教爲諸州

縣式

林志

歐陽鈇字伯威廬陵人少負氣節有文章其詩騷最工能發前人關鍵楊誠齋愛其詞至手鈔警句詞之王庭珪劉永弼楊愿每以孟襄陽賈長江相比蓋一時人豪

也

林志

謹案白志別有歐陽伯威傳一人兩見謝志已削

梁棟字充道龍泉人以直言爲用事者所忌遂不復進取晚以肖顏名堂周必大常從之游因作記稱爲隱君

子云

林志

劉彥登字允升永新人由舍選登進士後提兵討虜寇郡境以安歷官三十年終朝請大夫知漢陽軍所著有

竹溪文集

豫章志

陳千齡泰和人建炎進士官韶州曲江簿有潮陽令以軍事犯賊權貴多爲之地檄千齡推鞠援者踵至夜饋以金不受至推問得實升虔州司法參軍

人物志

李靚字彥和吉州龍泉人幼孤母督之學不肯卒業母詰之辭曰國家遭女真之變寓縣雲擾士當捐軀爲國戡大憝安能咕囁章句閒效淺丈夫哉岳飛督師平虔寇挺身從之未行奔母喪服除走淮南以策干都督張浚浚奇之使隸淮西總管孫暉鎮下以功授承信郎紹

興十年金將翟將軍犯境靚與部曲當其鋒轉戰至西
京天津橋南俘翟將軍乘勝逐北會金師大至遂死之
年三十一

宋史

胡銓字邦衡廬陵人建炎二年高宗策士淮海銓答策
萬餘言將冠多士有忌其直者移寘第五授撫州軍事
判官丁父憂從鄉先生蕭楚學春秋紹興五年以賢良
方正薦賜對除樞密院編修官八年宰臣秦檜決策主
和金使以詔諭江南爲名中外洶洶銓抗疏乞斬王倫
秦檜孫近書上除名編管昭州朝臣多救之者檜迫於
公論乃以銓監廣州鹽倉改簽書威武軍判官編管新
州移吉陽軍檜死量移衡州銓所上書進士吳師古錄
本傳之金人募其書千金孝宗卽位復奉議郎擢起居

郎兼侍講史院編修官時旱蝗星變詔問政事闕失銓
應詔上書數千言始終以春秋書災異之法言政令之
闕有十而上下之情不合亦有十又言和議成有可弔
者十和議不成有可賀者亦十尋乞致仕除敷文閣直
學士與外祠陞辭猶以歸陵寢復故疆爲言所著易春
秋周禮禮記解詔藏祕書省薨諡忠簡有澹菴集一百

卷宋

彭元亨字文昌安福人父病篤禱於神乞捐已壽以益
親年父尋愈嘗服膺呂東萊辨志早夜力行不怠君子
謂其見善如力耕云

林志

劉大有字處謙安福人於書無不讀嘗曰人度以篋我
度以腹所著文五百篇曰遜齋野錄

林志

羅棐恭字欽若吉水人建炎進士授虔州司理參軍宣諭使命鞠賊賊富且黠故有以持有司至是復餽錢二十萬求脫棐恭竟論殺三十人移潭州平反死獄十一人遷荔浦令荔浦民輓粟五千石餉宜州棐恭言於轉運司曰縣抵宜州絕遠不通舟楫晚餉不便改知石城搆捕宿盜七十人減民稅紹興二十二年簽書道州軍事朝旨命鞠邵州民張臣駟獄初臣駟爲讎誣與賊通獄吏得賂力主讎家遂起大獄連坐者三百餘人殫死者七十人黥而流者二十八人沒入貲產者十八家棐恭廉得其實正獄吏罪而前獄盡得釋通判贛州俗憎女生則溺之乃作溺女戒文下十邑悉禁民之溺女者隆興初胡銓力薦於朝授左朝奉大夫知武岡軍以疾

卒其學遂於名數字書有詩文三十卷行世

吉州人文紀略

解元字善長吉水人疏眉俊目垂手過膝能百步穿楊葉號小由基初起兵保安軍德清積功授清澗都虞候建炎三年詔隸韓世忠擢偏將軍世忠出下邳聞金人大至元領二十騎俘其生口俄而復出敵騎數千四面集擲身陷陳左右鵲擊大呼聲振刀甲眾辟易遁去以功授閤門宣贊舍人苗劉之變從世忠討平之金人攻浙西世忠邀之京口橫海舟以截江敵出小舟數千以長鉤扳艦元躍入其舟大呼擊殺數十百人以功授忠

謝志

誤中州團練使統制前軍討閩寇范汝爲及湖外諸寇

功皆第一紹興四年金人及僞齊入寇世忠自鎮江趨揚州元趨辰州金兵大至元度明日必至城下先遣百

人伏於要路百人伏於岳廣自以四百人伏於路隅金人果走岳廣追獲不可勝計金萬戶黑頭虎最號驍勇直造城下會語元卽跳下城禽之追奔十餘里金人自驚擾溺死十餘萬人改同州觀察使保順軍承宣使加授神龍衛四廂都指揮使世忠罷兵柄爲樞密使以元統世忠之眾進侍衛親軍馬步都虞候封太原郡公保信軍節度使見朝廷專主和議屢表諫上不聽知大功不建感激發病薨時年五十四贈檢校少保孝宗追封太原王諡忠武

春兩堂集謝志舊案宋史解元傳云保安軍德清砦人未詳移家吉水本末

林志不載
白志采補

張翬字文奐永新人紹興初以積功授官乾道八年江西大旱翬捐粟助賑帥臣以聞升閣門祇候官至武義

郎居鄉樂善好施以億萬計

豫章書

王珠字仲淵吉州龍泉人以孝謹聞建炎閒居父憂芝數本生墓側倒植竹以爲杙復生柯葉紹興閒再罹母憂有雙竹靈芝之祥

宋史

劉禹錫永豐人筠州司理參軍左相虞允文表署江州觀察推官爲政以寬爲本民愛慕之不忍欺後至湖北路提刑一日歸忽有持金帛來者曰公生我者也願獻此以謝禹錫固辭從者私受之事覺索而投諸江中從者載一缸於舟尾禹錫命碎之曰無汙我

林志

羅濬字明甫龍泉人與弟克開自爲師友從學常百餘人每語其徒曰古之學者下學上達今文雖小技自有上達之理但爲科目所累故判爲兩途耳胡銓見而奇

之曰君造詣自高願常相與講明此理

林志

蕭穎字彥實安福人紹興進士知耒陽縣後起爲廣東漕屬居官清直能理獄訟父老爲之語曰訟無苦逢父

母

人物志

胡鎬字從周廬陵人任新淦尉兄銓謫海外鎬甘退二十年終不求謁張浚始薦進之除諸王宮教授樞密劉拱嘉其靜退謂朝廷當以中祕處之不果請外補授湖

南參議

林志

左慶延永新人紹興進士秦檜欲妻以孫女力辭不就或曰不利慶延曰士一失身則無以復立苟不利退而山林亦自多矣遂西歸檜憾之十年不調後以太學博士終

人物志

劉建直字謬卿安福人紹興進士得伊洛之學於胡文
定以浩名齋官終宣教郎知新喻縣以奉議郎致仕

楊誠

齋集

毛憲直字嵩老吉水人紹興進士授邵武主簿時光澤
令以非罪繫獄惠直閱獄詞多文致卽平反之進漢川
令拒縣尉培克之策杜太守贖貨之非嘗歎曰股民以
自安去國以安民兩言決爾引疾上印綬去

林志

劉安世字世臣安福人紹興進士知雩都有郡官諷以
羨餘獻者安世曰縣土田瘠而賦重安得有餘必若是
吾有去耳遂以疾辭安世之學以明道通經爲主遠近
從學者踵至卒之日門人私謚清純先生楊萬里爲之

制服

林志

周必大字子充廬陵人紹興閒進士中博學宏詞科教授建康府召試館職高宗讀其策曰掌制手也守祕書省正字館職復召試自此始孝宗踐祚除起居郎上初御經筵必大奏經筵非爲分章析句欲從容訪問裨聖德究治體兼編類聖政所詳定官權中書舍人嘗論邊事上以蜀爲憂對曰蜀民久困願詔撫諭事定宜寬其賦權給事中繳駁不辟權倖金索講和時舊禮必大條奏請正敵國之名趙雄使金齎國書議受書禮必大立具草略謂尊卑分定或較等威叔姪親情豈嫌坐起上褒之曰未嘗論國書之意而卿能道朕心中事此大才也兼權兵部侍郎尋權禮部侍郎改翰林學士在翰苑幾六年制命溫雅周盡事情爲一時詞臣之冠除參知

政事拜樞密使上諸軍升差籍時點召一二察能否王
帥悚激無敢容私又勅諸軍點試法淳熙十四年拜右
丞相明堂加恩封濟國公進左丞相許國公參政留正
拜右丞相上以內禪意諭二府二月辛酉朔降傳位詔
翼日吉服御紫宸殿必大奏陛下異位與子盛典再見
度越千古顧自今不得日侍天顏因哽噎不能言上亦
泣然曰正賴卿等協贊新君光宗問當世急務奏用人
求言二事三月進少保益國公改判隆興辭除醴泉觀
使甯宗卽位求直言奏四事曰聖孝敬天崇儉久任慶
元元年三上表引年遂以少傅致仕自慶元以後韓侂
冑之黨立僞學之名以禁錮君子而必大與趙汝愚留
正實指爲罪首薨年七十有九贈太師諡文忠甯宗題

其墓碑曰忠文耆德之碑自號平園老叟著書八十一

種有平園集二百卷

宋史

胡彥英字公武銓從子博學強記傳論語釋史漢尤長

於詩多警句

人物志

胡昌齡銓從子同事蕭楚學春秋乾道閒以特奏名對

策萬餘言官靜江司戶廉潔平恕滿一歲去帥守張栻

留之不可乃賦詩餞之

人物志

徐志道吉水人金兵游騎奄至邑志道與弟志遠昇母

逃為流矢所中挾矢行數舍而卒志遠負母撫兄痛哭

幾絕金兵追至備告以故兵慚解戈而謝曰此一門孝

友也遂釋之

安志謝志舊案安志孝義傳宋時尚有泰和羅伯嵩吉水周伯溫弟伯用附錄於

此

江西通志卷一百四十五

江西通志卷一百四十六

列傳十三 吉安府二

宋

羅泌字長源廬陵人學博才宏侈遊墳典迺搜集百家成路史四十七卷西蜀費輝爲之序子萃能世其學嘗

爲之注

吉州人文紀略

楊萬里字廷秀吉水人紹興進士爲永州零陵丞時張浚謫永杜門謝客萬里力請見浚勉以正心誠意之學萬里服其教終身知奉新縣陳俊卿虞允文交薦之召爲國子博士侍講張栻以論張說出守袁萬里抗疏留栻公論偉之出知漳州尋提舉廣東常平茶鹽盜沈師犯南粵帥師往平之孝宗稱之曰仁者之勇遂有大用

意俄以憂去淳熙十二年五月以地震應詔上書所言者凡十事約數千言親擢爲侍讀隨事規警太子深敬之王淮爲相一日問曰宰相先務者何事曰人才又問孰爲才卽疏朱熹袁樞以下六十人以獻淮次第擢用之歷樞察院檢詳遷左司郎中十四年夏旱萬里復應詔疏四事以獻言皆懇切遷祕書少監以直祕閣知筠州紹熙元年借煥章閣學士爲接伴金國賀正旦使出爲江東轉運副使權總領淮西江東軍馬錢糧朝議欲行鐵錢於江南諸郡萬里疏其不便改知贛州不赴乞祠提舉萬壽宮自是不復出矣卒年八十三贈光祿大夫萬里爲人剛而褊韓侂冑用事欲網羅四方知名士嘗築南園屬萬里爲之記萬里曰官可棄記不可作也

侂冑恚改命他人臥家十五年皆其枋國之日也侂冑
專僭日益甚萬里憂憤怏怏成疾家人知其憂國也凡
邸吏之報時政者皆不以告忽族子自外至遽言侂冑
用兵事萬里慟哭失聲亟呼紙書曰韓侂冑姦臣專權
無上動兵殘民謀危社稷吾頭顱如許報國無路惟有
孤憤又書十四言別妻子筆落而逝萬里精於詩嘗著
易傳行於世光宗嘗爲書誠齋二字學者稱誠齋先生
賜諡文節

宋史

嚴致堯字正之岳飛授鉞專征道出廬陵所過搜訪奇
士致堯一見語合許以從行初龍泉賊帥彭友等盤踞
四年攻破八縣至是就縛奏凱而還其後定鼎澧安湘
漢取唐鄧復郢隨致堯皆在軍中屢委以事積功版授

七階方將長驅宛洛而岳罷兵柄矣致堯歸自放山水

閒號龍洲居士有文集三十卷

林志

王伯芻字駒文廬陵人博洽工文辭日夜校讎箋注經

史凡前賢世系出處必推見本末家故貧一介不取諸

人楊萬里目爲淮海文士

林志

王子俊字材臣吉水人嘗從楊萬里周必大遊乃延譽

於朱子朱子勉以博取約守之功又書格齋

安志作格齋

二

大字遺之所著有史論師友緒言三松類藁行於世

物志

羅良弼字長卿廬陵人博學強記上下數千載閒成敗

利鈍灼見如縷官會昌尉廉潔自持服食器用悉取於

家

林志

歐陽斗南安福人性質直尚風節時秦檜專政斗南上書言國事伏闕下三日不納斗南退宿旅舍束草爲人以書置手中設祭其前鑰門而去後爲舍人所首檜怒甚移文大索不可得

人物志

王大臨字舜輔吉水人建炎中金人南侵父被掠大臨年十二號泣從行數十里盜欲兵其父大臨抱持痛哭請代羣盜義而免之

林志

羅椿字永年廬陵人楊萬里高弟累舉進士不第自號就齋作詩宗少陵

豫章詩話

彭合廬陵人紹興進士知臨江軍士旣瘠而前吏增耗與正額等民苦之合秩滿入對力陳其害由是浮稅悉蠲後爲京西總領卒於官

人物志

羅士友字兼善廬陵人早喪父卽取諸逋券焚之曰迫人非仁也有急必賑之旦起盥櫛畢危坐堂中終日不惰倚雖盛寒暑率以爲常里之言家法者皆推重羅

氏著有史編及諸家詩體

人物志

李猷可吉水人年六歲孝宗召入官試之以詩稱旨

林志

胡維甯字季懷廬陵人紹興鄉舉閉門著書有易筌蹠詩集善春秋類例及周官左氏類編傳世

林志

戴之邵字才美安福人紹興閒金人南下京西招討使吳玘以書招之充忠義軍統制給器甲五千之邵植旂南門外以募忠義日赴者千人遂分五軍與敵屢戰屢勝自鄭州入西京朝謁諸陵別置永安軍差官供奉諸陵分遣陳孝恭等收復鄭州密縣等處金人來攻之邵

移兵嵩山深谷中設伏敗之還至襄陽珙勞於郊錄功不受竟歸鹿門孝宗時特改京官以刑部員外郎將漕

西京卒

林志

王炎字季安廬陵人紹興初羣盜旁午遣大將劉紹先攻之不能下炎身先士卒賊尋滅上功辭不受時淮西大饑船粟千斛以獻丞相李綱聞於朝授安遠主簿不拜未幾廬陵大饑輸粟千斛以賑

林志

倪師尹泰和人紹興進士爲英州獄掾太守周彥輝每引例以折之師尹曰三尺固存吾安問例嶺南獄具多苟簡師尹更革損益一以新書從事既卒貧無以歸其同官助之妻嚴氏泣曰吾夫廉忍累之乎力辭不受

物志

李次魚字直卿吉水人紹興鄉舉爲長沙酒正博學力

行名其館曰復齋退食則讀書其中

林志

胡箕字斗南廬陵人官修職郎事親孝所著有三傳會

例孫吳子注并遺藁三十卷

林志

彭堯輔字道夫廬陵人以蔭授贛州錄事與提刑執辯

活非罪死囚官軍捕茶寇聞俘平民堯輔悉平反之進

知連州陞辭論枝江義勇差役興國私鑄上皆嘉納

林志

彭商老字仲伊合長子以蔭官至南安通判嘗以法繩

吏致招誣謗而臨政平允持己廉潔卒無毫髮可文致

者內外臺皆賢之

林志

項充字德英龍泉人幼承兄洵美訓誨成立以春秋學
試上庠當析產充盡以遜兄答其教育之恩知郡王洋

上其事詔旌門

林志

彭漢老字季皓商老弟以門蔭累官直祕閣致仕所至多善政如活瘼死之囚化茶商之盜正綱運侵欺之弊革焚尸敢墓之俗嫁宦族流落之女類皆厚民敦化嘗陞見對三事皆報可又請增戍兵修器械豐儲積補常平亦多施行

人物志

歐陽閔

一作果

字彥昭永新人隆興初任新化主簿嘗著

盡心錄以見志年方壯遽請致仕時宰固留之不可遣之書謂古今所難而獨易爲之高風凜然足以律貧激

懦及卒胡銓志其墓

永新人物志

劉鄂泰和人嘗應詔上書萬言論時事又作邊防龜鑑七十卷太守王佐薦之朝得旨免解歲大旱嘗減價平

糴以利人赴人之急勇於必爲

人物志

歐陽彝廬陵人與兄弇弈弁俱有文采時稱四傑胡銓措置海道彝畫禦戎要策銓奇之其所著憤世嫉邪書

尤爲人所傳誦

林志

孫逢吉字從之吉州龍泉人隆興進士就常德教授以歸李燾劉珙鄭伯熊劉焞相繼薦之知萍鄉縣以治最聞除國子博士兼實錄院檢討官遷祕書郎紹熙二年春二月雷雪交作詔求直言疏八事去蔽諛親講讀伸論駁崇氣節省用度惜名器拔才武飭戎備擢爲右正言建言都城之民安居憚徙宗族營繕寢廣每建一第撤民居數百浴怨者多時親王方更造樓觀未已聞之亟令罷役在諫垣七十日章二十上詞旨剴切皆人所

難言者朱熹在經筵持論切直小人共不便潛激上怒中批與祠逢吉時在講筵吏請曰今日某侍郎輪講以疾告孫侍郎居次請代之逢吉問某侍郎講義安在取觀之則講詩權輿篇刺康公與賢者有始而無終與逐朱熹事相類逢吉欣然代之講因於上前爭論甚苦上曰朱熹言多不可用逢吉曰熹議祧廟與臣不合他所言皆正未見其不可用浸失上意丞相趙汝愚既罷侂冑專國一日扈從重華宮上行禮畢駕輿扈從者出宮門上馬忽傳呼侂冑至扈從者卻入斂板甚恭逢吉不揖而去會部中會食吏密報優人王喜除閤職逢吉卽言於上前效朱侍講進趨以儒爲戲者豈可令汗閤職卽抗疏力爭之同列密以告侂冑時王喜之命實未出

遂以誣詆出知太平州乞祠提舉江州太平宮卒謚獻

簡弟逢年逢辰皆有文學行義時稱孫氏三龍

宋史

孫逢辰字會之逢吉弟乾道進士淳熙中茶寇轉掠江

西逢辰以贛縣丞督餉乃隨所至易米省饋運十之七

八後又上計漕司將袁贛兩州所納油麻隨升斗而折

之所少之數悉與蠲免漕奏請得旨兩郡悉蒙其利

林志

羅全略字仲謀廬陵人乾道進士永州司戶參軍湖南

歲饑當發倉全略單騎入墟落家喻戶曉民被實惠嘗

奉檄按永州白減其租過半掾漕不可全略曰得邦賦

失邦本其患孰急太守從之民曰活我者戶曹也

人物志

胡敬之吉水人與歐陽守道講學白鷺書院歷任修職

郎沅州錄事參軍除涇祠釋冤獄後以論史彌遠被斥

人物志

劉過泰和人自號龍洲道人以詩俠名湖海開周益公
聞其名欲客之門下不就叩閣一書請光宗過重華宮
辭意懇婉聲重一時嘗以書陳恢復方略謂中原可一
戰而取用事者不聽以是落魄無所遇合晚年欲航海
抵崑山友人潘友文留之尋卒吉州人文紀略白志
詩派中一人也其詩名龍洲集近有偽刻作蘇叔黨
川集者卒葬崑山城中祠墓至今尚在安志既列劉過
復列劉改之分名
字作兩人誤矣

羅維藩字价卿廬陵人乾道進士任保昌尉秩滿入京
師極論二廣賁海改法之弊又作平邊策謂當首甦民
瘼興內治以俟天時林志

羅克開字達父龍泉人乾道進士宰廣昌有惠愛憲使

鄭汝諧行部邑民遮道借留鄭問知縣何長民雜對曰
不愛錢不苦百姓此其所長也遷大理正同列欲奪巨
室沙田歲入以媚韓侂冑克開力持不可由是出知郴
州至州首廢永豐銀冶還社倉於民移守蘇州青衫手

板外惟橋隱集三卷而已

人物志

張奭字保叔廬陵人以門蔭累官知永州建炎兵餘民
多死徙賦稅罅漏奭白府請檢校冒耕之田實其主名
府以新建武甯二邑命其檢校得實以報下其法於諸
邑其賦始均歲饑乃節浮糴鄰得粟十萬石活饑民九

萬有奇

林志

胡桀字仲方銓之孫爲江西憲楊長孺稱之曰繡衣王
斧威惠兼施玉虹翠浪又逢賢主蓋用東坡虔州詩以

美之也甯宗朝仕至工部尚書

豫章詩話

羅晟字伯華龍泉人以蔭授郴州司理有誣平民爲盜者言於郡釋之治新喻請官田以養士治合浦能禦寇不爲民擾

人物志

曾光祖字景山安福人淳熙進士仕徽州錄事決讞明敏薦知新喻逾年而邑大治平居喜著述有禮記精義

治功必致錄行世

林志

張綱字德堅永新人翬之兄子淳熙進士靜江司戶決滯獄興水利遷永平令以威愛而化獠獍創浮橋以利湍險教醫藥以代巫祝旣滿將去蠻人相率詣帥守監司乞留後以宗正知郴州入對言薦舉殿最不公文體士風未正及州縣侵漁諸軍老弱戰艦蠹弊宮祠泛溢

民力彫瘵上皆嘉納之

永新人物志

楊長孺字東山以父蔭守湖州彈壓豪貴治聲赫然郡之士相與肖像祠於學宮擢經略廣東以己俸代下戶輸租遷福建安撫使置強宗累年負租者於法真德秀入朝甯宗問當今廉吏德秀以長孺對端平閒加集英殿修撰致仕紹定初起判江西增田養士發廩賑荒鄉人德之卒謚文惠

豫章詩話

謝志舊案楊長孺誠齋

無疑友善往來倡酬時稱其風味不減平園誠齋二老

尹四聰字清陰安福人由進士宣議撫州愛民如子文天祥嘗署其居曰高門孫用和有春秋通旨傳於世

林志

劉南鵬字叔程永豐人新淦縣丞將赴春官憲牒委問清江疑獄南鵬曰功名輕人命重卽變姓名爲卜者親

抵其地既廉得真殺人者一人及湖水涸又得被殺之

冤骨免無辜五十餘人後居官所至以寬廉稱

人物志

李如圭吉水人中童子科孝宗召誦尚書如圭即誦無

逸篇帝喜撫榻和誦至終明日賜宴以父在賜珠簾隔

之後登進士官至福建安撫

林志

蕭麟字耕道廬陵人開禧進士知仁化縣教民爲水車
救旱之具爲民奏田缺賦存之害卒於官民肖像祀焉

林志

胡洪範吉水人國學生因星變應詔上書論賈以道專

權誤國似道怒欲置之死丞相江萬里抗疏力救獲免

家居憂憤成疾卒

人物志

伍瑞厚字伯謹安福人事父母以孝著部使者聞之朝

賜號孝節處士

林志

左馨字元規永新人開禧進士使金不辱命錄國子大
得士心廉察黃岡沿江要地城堡完固未及召而沒民
立祠祭之所著有坦齋藁

永新人物志

周雲字從龍吉水人以詩古文受知於周必大開禧開
眞德秀奉使辟掌箋奏授行在同知主管樞密府機宜
文字領兵北歸調荆襄累有功擢廣西兵馬鈐轄二親
喪卽以所居立院守其墓

縣志

龍升之永新人嘉定鄉舉陳愷帥九江禮聘任以事遂
建城永新之議奏名調臨川戶曹預修中興政要書成
除福建節幹在幕修帝學增釋二百卷

人物志

王洋字大猷龍泉人特奏名調英州推官行義修飭長

於文字尤昌於詩自經史百氏下至稗官小說皆采英

華以資詩歌之用故詞富才贍律老法嚴

林志

胡夢昱字季昭吉水人嘉定進士官大理評事傳國璽
來歸羣臣皆遷官夢昱獨辭不受尋以星變言禍機者
五事及霄川之變濟王死史彌遠窮治其獄轉相誣引
夢昱上書反復言濟邸之不幸其事與管蔡秦邸不同
乞隆追贈褒崇之典降存亡繼絕之詔又遺書詰責彌
遠彌遠大怒於是御史李知孝梁成大迎合風旨劾夢
昱編管象州以疾卒夢昱一門孝友弟利用從編管象
州死兄夢白昇喪歸又死端平元年御史王遂言夢昱
仗節仗義之風足以寒亂賊之膽上亦追悼詔贈朝奉
郎諡剛簡

豫章書

白志舊案科目

考胡夢昱嘉定丁丑吳潛榜進士豫章書訛作夢旦今改正又

案詩話季昭之兄子建弟國賓皆博學能文友愛最篤
得罪之日囊無一錢子建挈家歸賣文自活國賓徒步
從其兄至貶所國賓先沒季昭繼之端平初詔許歸葬
云云夢白即子建利用即國賓也又林志載有胡夢虎
字叔炳者紹定進士上書
論賈似道所至有政聲

周必彊字子柔必大之弟剛明孝友爲詩文皆驚人語

真德秀嘗題其集曰假之以年必將追騷人而與游望

聖門而力進

林志

劉元剛字南夫吉水人嘉定進士官韶州守真德秀見
其文亟稱之理宗嘗立貪廉二碑元剛居廉碑第四所

著有孝經論語孟子衍義容齋雜著等書

林志

左師召永新人嘉定進士守新州始終廉潔卻船貢不

收委公俸不取秩滿致仕去

林志

朱渙字約齋廬陵人文天祥受業而嘉定中進士任大

理寺丞知衡州文章政事名重一時

人物志

劉奎字幼文泰和人由進士官濠州通判宰甯鄉時寇偪潭城制帥以軍餉不給告奎以縣帑干緡上之爲諸

邑倡治行表著臺省交薦以賢能名

人物志

左譽蕃族弟紹定進士爲景陵尉北兵陷城被執與母

妻子同時遇害贈員外郎命建祠岳陽

吉州正氣錄白志舊案豫章

書賜祠額閻忠贈承事郎與此不同紹定誤紹興從登科錄改正

黃登吉水人紹定進士主管制司機宜文字授筆立成

夜有謀變者或以告登堅臥不動翌日坐廳事以他事

召之誅其首餘悉不問一軍乃安

林志

周寅龍字澤之吉水人紹定閒擢博學宏詞以言忤時

宰引疾不起經書根極要領文章華縟一時傳誦取法

焉門人私謚曰恭文

林志

江文卿永新人端平閒其母病革不可療文卿刲股和藥進之病遂愈邑令以聞旌表其門

永新人物志

劉南甫吉水人嘉熙進士嘗講學白鷺書院歷安遠縣簿去淫祠治冤獄民至今祀之

縣志

龍森永新人嘉熙閒以所著春秋三傳評續南唐書進授登仕郎誥詞以孫復劉恕褒之族子崇字邦之出真德秀之門以薦預修中興政要

永新人物志

劉子澄字清叔泰和人知棗陽後較畫史厓軍事爲賈似道所忌劉將孫稱其有史才所著有玉淵集平淮疏

補史行於世

林志

文儀字士表廬陵人天祥父也氣質端重進止有尺寸

讀書夜以繼日每有所鈔錄揮汗呵凍弗輟故學博而

文多可傳人稱爲篤志君子

林志

主元孫字伯初吉水人理宗朝皇嗣未定元孫年十七
伏闕上書乞立忠王榘爲儲嗣朝旨授樞密院校勘自
是臺端皆以忠王言卒正儲位度宗莅阼欲加恩澤元

孫竟致仕以歸

林志

歐陽守道字公權吉州人少孤貧無師自力於學里人
聘爲子弟師主人瞰其每食舍肉密歸遺母爲設二器
馳送乃肯肉食年未三十翕然以德行爲鄉郡儒宗淳
祐元年舉進士授雩都主簿丁母憂服除調贛州司戶
江萬里作白鷺洲書院首致守道爲諸生講說湖南轉
運副使吳子良聘守道爲嶽麓書院副山長萬里入爲

國子祭酒薦爲史館檢閱召試館職授祕書省正字遷校書郎改景憲府教授遷祕書郎以言罷守道徒步出錢塘門惟書兩篋而已咸淳三年詔大臣舉賢才少傅呂文德舉九十六人守道預焉添差通判建昌軍遷著作佐郎兼崇政殿說書兼權都官郎中經筵所進皆切於當世務遷著作郎卒

宋史白志舊案守道初名巽後以應舉更名自號巽齋吉州

人文紀謂文宋瑞鄧中義劉會孟皆出其門文山嘗言先生之學如布帛菽粟求爲有益於世用而不爲高談

虛語以自標置於一時蓋實錄云

曾如驥字德稱泰和人淳祐進士官寶慶通判值長沙失守謀者咸謂降足自保驥曰吾安忍爲身謀誓與此城俱存亡旣知不可爲遂書舍生取義章於郡齋壁上投濱江死景炎元年贈敷文閣待制諡忠愍

吉州正氣錄白志

舊案忠愍死事始末詳見羅念菴寶慶祠記及尹洞山祠堂碑中

劉芳遠安福人嘗爲澄邁縣尹棄官歸數年海南寇亂州郡莫能制縣民走安福迎之芳遠奮然曰民故吾民也吾不忍其橫罹暴亂乃往率縣人與賊戰近郊以寡

援死

林志

文天祥字宋瑞廬陵人寶祐進士第一簽書甯海軍元師侵宋內都知董宋臣主遷幸議天祥上書乞斬宋臣以一人心後宋臣復入又上書極言其罪不報賈似道乞致仕天祥爲玉牒檢討當制知其志在要君裁之以義內制相承皆呈藁天祥獨不呈遂忤似道乃援錢若水例致仕咸淳十年起知贛州德祐初元師渡江詔諸路勤王天祥捧詔涕泣發郡中豪傑萬人遂入衛時朝

議方賴呂師孟呂文德以求好天祥上疏乞斬師孟覺鼓以作將士之氣不報出守平江至則元兵已下金陵入常州矣天祥命其將率贛兵三千與張全往援常將士殊死戰張全擁兵不救贛兵悉死明年除知臨安府尋拜右丞相有旨令詣北軍請和既至伯顏折以危言天祥曰天祥爲宋狀元宰相所欠只一死報國耳刀鋸鼎鑊非所懼也明日吳堅賈餘慶等奉降表至天祥大罵其賣國且責伯顏失信伯顏挾天祥北行中道以計脫歸崎嶇眞揚閒自高郵泛海至温州上表勸進晉左丞相仍以都督出江西與元兵戰於贛州汀州閒及空坑之敗乃入海訪問車駕時益王昀衛王繼立乞移軍入朝陸秀夫張世傑阻之加少保封信國公天祥收殘

兵由循州駐南嶺元將張宏範兵奄至眾不及戰天祥倉皇出走爲千戶王惟義所執厓山破軍中置酒大會宏範勸之降天祥泣曰國亡不能救死有餘罪況敢有二心乎宏範義之遣使護送入燕拘兵馬司者四年有王積謝志誤續翁者欲合謝昌元等十人請釋天祥爲道士留夢炎不可遂已至元十九年世祖召入問曰汝何願天祥對願賜一死臨刑從容謂吏卒曰吾事畢矣南鄉拜而死其妻歐陽氏收其尸衣帶中有贊云孔曰成仁孟曰取義惟其義盡是以仁至讀聖賢書所學何事而今而後庶幾無愧時年四十七元初謚忠武明景泰中改謚忠烈白志

文天禎丞相天祥兄也寶祐閒鄉舉署廣濟學諭造士

有方士風丕變宋亡天祥死節天禎不仕寓廣濟五里

橋東家世業儒迄今未艾

湖廣通志舊有文壁傳

謝志舊案前志吾汶集云帝昺

戊寅文山以樞密開府惠潮壁以戶部侍郎任惠州是冬元兵入廣文山被執不屈而壁以城降文山執後繫頸繫手足備極艱苦而壁以郡守入覲亦至燕文山詩云兄弟一囚一騎馬同父同母不同天今削天禎入元高遜從前諸志俱不載今補

鄒淵字鳳叔吉水人後徙永豐少慷慨有大志從文天

祥勤王補武資至將軍益王立領江西招諭副使聚兵

甯都復興國永豐二縣進兵部侍郎兼江東西處置副

使及永豐敗從天祥開關嶺道未幾復出開督府分司

永豐興國境上北兵驟至大戰淵脫身走潮州及天祥

被執淵自殺當是時從天祥勤王死事者淵與劉子俊

等凡十九人

宋史

劉沐字淵伯廬陵人文天祥鄰曲也少相狎暱天祥好
弈與沐對局窮思忘日夜以爲常及起兵辟補宣教郎
督府機宜暨天祥出使沐領兵還天祥歸開府南劍沐
收部曲來會改授太府寺簿專將一軍爲督府親衛會
空坑兵敗被執至豫章父子同日死焉仲子死亂兵季
子復從天祥死嶺南當時江西忠義皆沐所號召沐性
沈實而圓機晝夜應酬亶亶不倦云

宋史

孫梟字實甫吉州龍泉人獻簡公抃之後天祥長妹壻
也天祥起兵檄梟招忠義士補宣教郎帶行監官告院
知吉州龍泉縣天祥擁兵出贛里人奉梟復龍泉拒守
不下尋爲叛者所陷執至隆興殺之

宋史

蕭明哲字元甫泰和人性剛有膽氣明大節少舉進士

天祥開府汀州辟充督幹架閣監軍師出嶺明哲以贛縣義民復萬安連結諸砦拒守兵敗被執不屈死於隆興臨刑大罵不絕口聞者壯之

宋史

蕭燾夫永新人與兄敬夫俱天祥客燾夫爲詩有豪俊氣天祥起兵補從仕郎及彭震龍謀復其縣燾夫贊之縣受屠兄弟俱死之

宋史

彭震龍字雷可永新人天祥次妹壻也天祥起兵補宣教郎帶行大社令知永新縣會天祥出使被執震龍遁歸吉州已失乃結峒獠起兵天祥兵出嶺震龍接應復永新元兵至震龍爲親黨所執至帥府要斬之屠永新

宋史

張履翁顏斯理俱永新人與彭震龍同舉義兵歃血城

守值元兵突至有劉磐者為內應城遂破磐亦永新人

素無行義至是屠城以快私憤三人被執不屈同時死

之里人至今稱三姓為勤王忠義之家

林志案正氣錄斯理

作斯立謹案吉安府志顧斯立吉水人與從子起巖同死而節文天祥樂燕獄集杜句哀之

劉士昭泰和人嘗為鍼工與鄉人同謀復泰和縣兵敗

血指書帛云生為宋民死為宋鬼赤心報國一死而已

因以其帛自縊死其黨入獄多乞憐苟免有王士敏者

獨慷慨不撓題其裾曰此生無復望生還一死都歸談

笑聞大地盡為腥血汗好收吾骨首陽山臨刑歎曰恨

吾病失聲不能大罵耳

宋史白志舊案王士敏亦泰和人正氣錄訛作黃應從史

劉子薦字貢伯吉州安福人父夢驥以進士歷官知澧

州沒於王事子薦以父任為湘鄉尉調撫州司錄有懇

王應亨毆死荷擔黃九者獄成矣子薦閱爰書疑而駭之俄烈風迅雷闢獄戶裂吏楔殺人者實孔目馮汝能非應亨也獄遂白得免死者八人改知贛縣監行在左藏庫通判常德府知融州至官以廉靜著聞主管仙都觀廣西經略司檄爲參議官德祐二年北兵至靜江權經略使馬堅遣子薦提搖兵藥弩手守城東門勢不克時瀛國公已入燕子薦取笏書其上云我頭可斷膝不可屈登城北望再拜取所衣袍瘞之語左右曰事急不可爲吾惟以死守或諷子薦遁去子薦曰死事義也何以遁爲竟死之

宋史

劉子俊字民章廬陵人嘗中漕試少與文天祥同里開相友善天祥開督府興國子俊詣府計事補宣教郎帶

行軍器監簿兼督府機宜空坑兵敗子俊收兵保洞源
接應郡縣尋入廣與元兵遇戰敗復招集散亡與鄒淵
同趨潮州天祥兵敗子俊被執自詭爲天祥意使元兵
不窮追天祥可閒走也未幾別隊執天祥至相遇於途
各爭眞贋至大將前始得其實乃烹子俊

宋史 白志
舊案子俊死

節史傳昭然林志以爲
莫知所終何其謬邪

羅開禮字正甫永豐人袁州教授江上兵起文天祥辟
知永豐倡義以仗大節連兵鄒淵駐師永豐深溝固壘
蓄養銳士攻吉安南贛南雄大捷響應垂下臨洪忽吉
贛軍潰元李恆兵又自隆興來乘勝追及空坑天祥幸
脫恆大索開禮開禮隱巖中執囚吉安不屈八日不食
而死天祥爲制服慟哭祭之

林志

張雲吉州人嘗爲敢勇將文天祥師入衛雲隸麾下及天祥以使命被執雲引兵自婺建劔汀取道歸時吉州已降雲謀興復夜襲元兵殺傷相當質明猶戰渴赴水

死

明一統志

劉欽吉水人鄉貢士有風節上下古今健於議論行府至汀欽來就招諭使鄒淵北軍奄至死於亂兵同死者

鞠華叔顏斯立顏巖皆吉之豪傑

吉州正氣錄白志舊案林志有鞠華叔

無劉欽府志所載二顏一名斯理一名起巖與正氣錄互異兩存之以俟考

張瑛張珩皆吉水人周貧三十餘年文天祥募義士勤

王瑛兄弟從募俱死於兵

林志

錢淵龍字申叟吉水人文天祥勤王以淵龍爲招討副使率兵復泰和會元帥李恆遣偏師至力戰鍾步與弟

翔龍同日死天祥被執北行過戰場爲文祭之

林志

吳希夷安福人文天祥起兵夷自以名通於督府聚眾數千復袁州萍鄉與北兵會據險待命以眾寡不敵一

門三十口俱死

吉州正氣錄

胡文可字可山泰和人有謀略便騎射文天祥起兵文可從之參謀禮爲上賓先一夕天祥夢火明日文可緋衣謁軍門與語喜曰殆天以資我邪爲更名夢炎及兵敗文可亦被執脫歸後集兵赴難而死其弟文靜先授提督時無敢拒北兵者拒卽屠而泰和已下乃招致文靜不屈曰甯死不負趙氏遂闔門死之

府志謝志舊案前志載文可

脫歸後卒於家與此不合其弟文靜之死及胡氏闔門殉難事失載今改補

金應吉水人以筆札往來文天祥門下凡二十年從勤

王授兵馬都監天祥被執左右皆散應上下相隨更歷

艱難奔波數千里及脫走鎮江以憂憤死

吉州正氣錄

易相廬陵人官直學士安撫使從勤王復吉贛駐師廬

陵旬日間敗於方固石下死之

林志

鍾寅廬陵人空坑兵敗與劉欽等合戰死之

林志

劉伯文字政平吉水人以武舉賜第從勤王景炎二年

督府駐興國伯文受檄結約遠近至袁州仰山廟爲巡

兵所執搜其行李得文書甚多伯文慨慷自引一不以

累人獨斬於市家屬徙燕

吉州正氣錄

李應革字式夫吉水人寶祐進士爲崇政殿說書時吉

郡大饑經筵講罷上從容問應革鄉里革以饑對上惻

然不日減糴應革復取建隆紹興乾道賑饑故事反復

陳於上前上爲之感動捐粟十萬以賑饑人賴以全活

家書應革姓號官爵祀之

林志

梁和叔龍泉人咸淳盜起集義兵保障鄉里後文天祥領兵討賊和叔傾貲運餉賊平天祥曰此非吾之能乃

汝之功也

林志

羅椅字子遠廬陵人寶祐進士清修博學時賈似道專國上書力詆其罪挂冠徑去不復仕

林志

周焱吉水人寶祐進士官南昌知縣宋亡誓不復仕閉

門著書以娛老有通鑑論斷四書衍義行世

林志

劉應登字堯咨安福人景定閒漕貢進士宋社將危隱居不仕其爲文出入經史劉辰翁趙文交推許之所著

有耘廬集詩經訓注杜詩句解行於世

林志

劉應鳳

謝志脫劉字今據府縣志及選舉補

字克舉安福人咸淳癸酉鄉

舉明年對大廷以言忤時相寅第五授簽判元兵偪江

南嘗署建昌邵事以時事日非遂隱去以文自娛

吉州人文

紀略

鄧光薦字中父廬陵人文天祥門友也少負奇氣以詩名世登進士第江萬里屢薦不就後客文氏贊募勤王挈家入閩一門十二口同時死賊火中乃隨駕厓山不數日厓山潰光薦赴海者再輾轉不死敵人援出之元帥張宏範改容以待後同天祥送燕京至建康囚天祥於驛中而寓光薦於天慶觀得從黃冠歸天祥賦詩三章送別又與其弟書曰鄧先生真知吾心者吾銘當以

屬之

林志

楊叔方吉水人博通經史天文歷數尤極研精著五經辨歷法五行論在太學與諸生上書斥賈似道之奸四方學者爭造其門以經學授清江范德機以歷法授甯都習吉翁習歷至今用之

林志

陳應乙吉水人公安縣尉因忤賈似道乞歸後從文天

祥勤王有功

林志

王炎午原名鼎翁別號梅邊學者稱梅邊先生庭珪諸孫自幼力學業春秋爲太學上舍生與文天祥同遊宋亡天祥募兵勤王炎午謁軍門勸天祥毀家產供給軍餉以倡士民助義之心又請購淮卒參錯戎行以訓江廣烏合之眾天祥嘉納目爲小范老子欲授職從戎以母病不果及天祥被執爲生祭文累千五百言其略曰

鼎翁丞相鄉之晚進士也進而父歿退而國亡生雖媿
陳東報汴之忠死不效陸機入洛之恥忠肝義膽凜然
如秋霜烈日蓋欲爲一死而無可死之地故以死節望
丞相云云自以太學舊生世移運改遂終身不仕奉母
至孝三十年不懈母沒廬墓三年設像以祀嘗以事宿
邑城夢母謂曰夜來侍婢不謹火吾衣幾及吾面且趨
至家謁遺像果爲跋燭所熟及面而止由是家居不復

出

白志
和縣志 泰

龍震翁泰和人性孝母歿未葬山寇焚掠火其居震翁
倉皇無計夫妻俱抱柩死死處有枯梅明年六月作花
事聞理宗旌其門曰孝梅里又御製詩曰南風六月吐
梅花奇絕西昌孝子家一點落英千古月夜來嘯殺後

棲鴉

忠孝錄

康夢吉字叔誼龍泉人在太學時不遊湖山不謁貴近賈似道欲授館力辭時人比之陳后山登咸淳進士任撫州教授嚴程試舉鄉射士譽翕然尋以宋亡棄官不

仕

人物志

王泰來字太初廬陵人父兄俱仕宋延賞弗及試藝屢屈晚值世變既貧且病而詩愈工門人劉辰翁每稱其師詩爲廬陵八邑之冠

吳澄大酉山白雲集序

劉解永豐人咸淳進士素以節義自許元兵入臨安三宮北遷解撫膺大慟既聞益王卽位於福州乃徒步至行在從文天祥勤王授軍前計議後與元兵戰歿於陣

邑志

蕭資吉水人文天祥幕下書吏通文墨從入廣惠難中
扶持甚至及空坑兵敗護衛太夫人全督府印有功潮

陽移屯與元兵遇死之

吉州正氣錄

劉辰翁字會孟廬陵人補太學生壬戌廷試賈似道專
國欲殺直臣以塞言路辰翁因言濟邸無後可慟忠良
戕害可傷風節不競可憾雖忤賈意而理宗嘉之寘丙
第以親老請濂溪書院山長江萬里陳宜中薦居史館
除太學博士皆固辭宋亡託方外以歸有須溪集于尚

友亦能文

林志

劉友益永新人系出清江居貧力學嘗傭書於人以給
膏火鈔綴講習凡經傳子史天文地志律厯象數靡不
淹貫爲人內剛木而外疏通練達世務宋季杜門不與

世接世稱水窗先生年八十五卒揭傒斯銘其墓積勤

三十餘年著通鑑綱目書法五十九卷

人物志

周京字伯寬吉水人咸淳解試直寶謨閣上書詆斥賈似道棄官歸元初屢徵不起著有五經纂史漢音辨等

書

人物志

張千載字毅甫廬陵人與文天祥友天祥貴時屢辟不出及天祥被執北上過吉州千載涕出相見曰丞相往千載亦往往卽寓天祥囚所近側三年供送飲食無缺又密造一櫝天祥授命日卽藏其首負骸南歸付其家

安葬

輟耕錄

王介字文卿吉水人咸淳進士授邵陽主簿談經論道各極旨趣致仕歸聚徒講學於山堂書院學者稱山堂

先王

林志

嚴肅字左方號朴山泰和人著朴山易說十四卷咸淳中丞相馬廷鸞江萬里上其書徵爲祕書省校勘數月卽自免去曰吾豈以榮名自嬰哉旋以疾終後人於所

居建朴山書院

人物志

劉應誠字信道永新人家窶甚形家或勸改葬應誠泣曰甯窶死忍就坏土徼福邪居亡何朱草產塋畔家益

昌

安志

胡幼黃字成玉永新人元龜四世孫咸淳甲戌進士第三人授節度推官未上而宋亡退居山中創讀書樓日呻諷其中元世祖用留夢炎等議令所在搜求宋遺士以聞同榜狀元王龍澤起爲監察御史幼黃避匿不出

時論趙之

吉州人文紀略

趙文字惟恭一字儀可廬陵人三貢於鄉仕南雄府教授與弟彊同出文天祥之門嘗從勤王於軍政多所參決彊死於軍中文請歸養所著有青山集

林志

解禧字公和吉水人知豐城增築新隄水不爲災以薦

擢知賀州陞辭陳二事曰君德曰役法朝論嘉之

縣志

文應麟天祥從孫倜儻尚志節景定中天祥弟璧守惠州應麟與之偕屢勸璧修城堞建樓櫓積芻茭糧儲以嚴守備璧易其言及元兵至竟以城降應麟恥之攜二

子起南遜於東莞之東渚遂家焉

廣東通志

羅公升字時翁永豐人大父開禮號水心翁公升少有才略以軍功授本邑尉傷大父死節傾資北遊燕趙與

宋宗室趙孟榮諸公圖復宋祚知勢不可爲回經錢塘江作弔胥濤賦以自寓今載集中餘詩亦多感憤語公

升有弟宋亡亦不仕父死於寇廬墓號泣不御酒食肉

者七年蓋孝義萃於一堂云所著有石初集

元無名氏
滄洲翁傳

王幼孫字季稚廬陵人性篤孝母劉疾苦痰醫莫之治

一日夢南陽活人書或投甘桔湯良覺如夢立愈寶祐

丙辰赴闕上書言國事萬餘言不報歸教授於鄉宋亡

其友文天祥兵敗被執過廬陵謁於驛舍爲文祭之期

以必死辭氣慷慨左右嗚咽莫能仰視自是日與賓客

過從守經執禮以終年七十六所著有中庸大學章句

二卷太極圖說擬答朱陸辨深衣圖辨經籍論易通貫

三爲一圖家傳譜系簡便經驗二方各一卷雜著若干

卷程雪樓集

康應弼字輔德龍泉人平生精力於詩所著有滄祐藁
寶祐藁開慶藁景定藁同時詩人如呂耐軒李義山李
蒙泉徐矩山姚雪坡諸公皆有倡和題跋其子同老合
而命之曰澹軒康氏詩藁吳草廬集謝志舊案草廬
原文矩山徐經孫雪坡姚勉
止庵林實夫芸莊蕭澥冰匡蕭立之俱有題
跋而前志誤作徐雪坡姪止庵謬甚今改正

元

劉詵字桂翁廬陵人性穎悟幼失父知自樹立年十二
作為科場律賦論策之文蔚然有老成氣象宋之遺老
鉅公一見卽以斯文之任期之旣冠重厚醇雅聲譽日
隆江南行御史臺屢以教官館職遺逸薦皆不報詵爲
文根柢六經躡躑諸子百家融液今古而不露其蹕厲

風發之狀四方求文者日至於門其所爲詩文曰桂隱

集桂隱說所號也至正十年卒年八十三元史謝志舊案說字桂

翁廬陵人劉鶚祖叔正字桂林永豐人前志以桂林卽桂翁謂說卽鶚之祖殊混謬今駁正

鍾過字改之永豐人其學源本六經動循古昔爲文精

深渾灝著述甚富今性理大全書多采其言吳澄改其

詩云未冠時聞改之先生爲世名儒今見先生所著書

深歎斯人之不可復見也縣志

曾德裕字小軒永豐人歷翰林直學士提調考功文書

時考功法久廢德裕乃詳覈掌故勒成歷式二卷官屬

皆受成焉弟巽申字亦軒至元初著鹵簿圖郊祀禮樂

圖以進命爲大樂署丞後除編修復推廣舊說繪中道

外仗二圖并書十卷藏祕府英宗祀太室取祕府圖書

覽之稱善擢爲應奉翰林文字兄弟所著名玉堂倡和

集

白志

吳鄴永新人原名張應珍宋末兵亂避仇轉徙山西元
駙馬都尉高唐郡王闊里吉思嘗從之質疑刊其書於
平陽路應珍以至元中由從事郎歷祕書監丞大德八
年遷祕書少監九年乃更姓名曰吳鄴

白志

馬佐順吉水人隱居著述知州白璧稱其有顏閔之行
賈董之才以所著書進英宗覽之賜名寶範授南雄路

判

林志

周南瑞安福人博學清操銳意古學與吳澄相友善多
所講辨所著有江西老圃集

白志

楊準字公平泰和人履行修潔嘗從學吳澄文章高古

甚爲虞集歐陽元所推許危素尤敬服之時修宋遼金

三史諸公薦之不就號玉華居士

人物志

王迪吉字浩吾泰和人通五經卓然爲鄉鉅儒出其門者皆博碩之士國子司業劉子高贊云五經堂堂學者

仰衣冠瞻瞻德之望

林志

王留孫字宜遠安福

謝志作人奉母至孝三十年不懈

父疾晝夜扶持衣不解帶者二年父沒旣葬結草如蘭

寢處墓側哀至悲泣苦草爲腐服闋猶不食醯漿蔬果

里人表其阡曰白華所居曰永思

歐陽圭齋集舊案留孫炎子

白志

黃瑞節字觀樂安福人力學精思嘗萃太極圖通書西

銘易啟蒙家禮諸書并加釋註題曰朱子成書

林志

龍仁夫字觀復永新人博學好古探濂洛之旨經傳子

史陰陽歷律無不精究所著有讀書臺集周易集傳十

八卷學者稱麟洲先生

豫章

劉鶚字楚奇永豐人皇慶中以薦授揚州學錄官至翰林修撰紅巾賊起擢江州總管改瑞州升廣東副使守韶六年屢卻強寇後分兵討獠峒贛寇數萬猝至戰守力盡城陷被執不食而終嘗建浮雲道院以教鄉族子弟學者稱爲浮雲先生子運字尊元元帥府經歷同父討賊死

林志白志舊案吳草廬歐陽圭齋所撰劉鶚詩序皆稱其大父桂林翁年一百二爲鶚作序祖壽而德孫少而才爲一家二瑞且以鶚爲廬陵人林志云永豐所當依序改正者也又楊東里集稱鶚官江西參政與此亦不同

楊景行字賢可太和州人延祐進士授會昌州判官會昌民素不知井飲汲於河流故多疾癘不知陶瓦以茅

覆屋故多火災景行教民穿井以飲陶瓦以代茅茨聚民十人號十虎干政害民悉捕寘之法調永新州判官奉命覈民田租除剗宿弊奸欺不容轉宜黃縣尹理白冤獄之不決者數十事升撫州路總管府推官金谿縣民陶甲厚積而凶險屢誣陷其縣長吏罷去之暴橫於一郡景行至以法痛繩之徙五百里外豪僧雲住發人家墓取財物事覺官吏受賄緩其獄景行治之如法由是豪猾屏迹良民獲安轉湖州路歸安縣所歷皆有惠政既去民皆立石頌之以翰林待制朝列大夫致仕年

七十四卒

元史

解子元字真我吉水人延祐進士官校書郎至正開兵亂募眾保障爲寇所圍與義士羅啟南姜天祐力戰同

日死

吉州正氣錄

高若鳳字在翁吉水人至治進士累官知封州興學卹民練軍養士會連城有寇警若鳳領兵收捕單騎抵賊穴諭之賊皆感泣羅拜解去

人物志

王繼遠安福人早負氣節至治閒以薦爲廣東推官境有亂繼遠以義激眾力拒之寇卻而繼遠已沒於陣事聞贈總管諡忠愍廟祀南海

吉州正氣錄

王仕政字小隱萬安人泰定進士除信豐主簿專務以德化民不尚刑辟改會昌猶治信豐民咸德之

人物志

解觀我名子尚入試名觀吉水人幼警敏嗜學自天文地理兵刑歷律靡不精究尤深於易著宋書一千卷天文星歷一卷地理若干卷衍八陣圖注武經刑書攷一

卷作萬分歷推步如神作儒家博要四書大義周易義
疑通釋行於世天歷己巳與弟蒙俱中江西鄉試上春
官不合吳澄以宋史屬之翰林典籍危素奉詔起修三
史觀上書其略曰遼與本朝不相涉又其事已具五代
史雖不論可也所當論者宋與本朝而已而所以定二
國之統者蓋有四說焉一曰明國朝之大體二曰稽先
哲之成法三曰證時賢之確論四曰審事變之微權蓋
金之興旣在宋後其亡又在宋前宋統始終自當屬於
皇元誠以此說而勘會之正宋統以概舉遼金公議表
著人心歷服永有辭於萬世矣時任事者多右金統書
上大忤徑歸居近虎邱山建東山書院於金釵嶺扁曰
麗澤齋弟子自遠至者甚眾弟蒙字來我所著有易經

精義

春雨堂集

馮翼翁字子羽弟獎翁字子將幼受學於父魯山兄弟繼領延祐鄉貢表所居坊爲雙桂翼翁授漢陽縣丞歷官撫州守著有春秋集解大義士禮考正性理羣書通鑑小錄考索類要正統五德類要古書正偽讀書纂要法家源流異政錄文章旨要別爲詩文集又二十卷獎翁未第而終亦以學間與兄齊名廬陵劉岳申志其墓謂永新三馮一鄉之瑞

永新人物志

陳奐彰永新人學書經元末隱白雲峯吟誦自樂有詩集學者稱古春先生

永新人物志

張光遠原名遠

白志作遠

以字行永豐人元季盜起沔陽

蔓延江右陷吉安光遠思建奇策翦寇其友羅維遠者

尚氣節遣人告之曰吾州素號文物之邦一旦遭盜蹂踐將無遺義不與賊俱生然非公不足濟吾事今郡守梁使君出督兵境上公宜往請師吾陰立部署以之斫賊無難者議既定未發寇諜知之帥眾執羅去裸而鞭之且授紙筆使寫首謀者名羅瞋目視之大書一死字賊反接羅於樹剖其腹作小竅曰增加之羅嚼齒大罵三日而後氣絕光遠脫走吉水勢稍戢還故里寇有知遣羅事者繫之至營從容語賊曰我纓綬之家決不畏死遂遇害子唯流寓河南以尚書中鄉試第官編修乞

宋濂銘墓以著父節

吉州人文紀略

彭絲字曾叔安福人博學貫穿諸家尤精律呂之學所著有黃鐘律說禮記集說庖易春秋辨疑等書

林志

彭復初安福人精於易範嘗本朱邵之說著易學源流

一時名士多出其門

林志

劉諤字公榮泰和人涉獵羣書大肆力於文章嘗作省身八箴示學者作善惡二箴以自省易簣之日朗誦朱子小學題辭一過而卒

豫章書

許天箴字時翁吉水人有易象圖說理學同異行於世

林志

李心原吉水人師事吳澄通五經確守朱子之學尤善

推演其說

林志

黃琢字玉潤吉水人以春秋教授鄉里有春秋舉要行

世

林志

楊舟字道濟吉水人授詩學於謝南窗作詩經發揮

林志

周聞孫字以立吉水人以鄉貢教授袁州河寇至聞孫倡舉義兵爲郡捍禦城遂以完著河圖洛書序說書經一覽五經纂要學詩舟楫等行世

人物志

劉岳申字高仲吉水人爲遼陽儒學副提舉以泰和州判致仕其文辭簡約峻潔甚爲吳澄虞集所推重學者稱申齋先生

人物志

周志遠吉水人以危素薦授太子說書一日得母書召其歸飄然南去志遠生於元仕於元然其心若有不自得者嘗自贊其像曰十年塵土變形容惟有丹心日月同北海子卿抵不乳未應已在畫圖中

林志

尹希善吉水人被薦授荆湖儒學提舉改宣城令有善政以病卒於官民哭之曰公來何其遲公去何其速使

我宣城民何以遂生育

林志

蕭志仁字無惡廬陵人學於其兄無咎淵博文雅著有論藁十卷詩四卷經解佩觿錄十卷史評講義雜著三

十卷

人物志

劉瑾安福人博通經史隱居不仕所著有詩傳通釋姚正叔安福人盜起率鄉閭擊之數年諸賊不能逞志至正乙未袁賊悉銳直抵砦下正叔率所部力戰至不能支舉旗招援時監普刺同知擁兵不救父子孫三代俱死

吉州正氣錄

劉聞字聞庭安福人天厯進士官太常博士帝祀南郊告祭太廟至甯宗室曰朕甯宗兄也當拜否聞對曰春秋魯閔公弟也僖公兄也祖廟之祭未聞僖公不拜帝

乃拜擢爲翰林編修宋史成進修撰著有春秋通旨容

齋文集

人物志

夏日孜字仲善吉水人舉天厯進士授從仕郎南康路
建昌州改授徵事郎興國路錄事再調紹興路會稽縣
尹其在建昌州有三陂界南昌新建間可溉田若干頃
廢且久民以旱告日孜相度形便遄復其利興國地僻
俗陋日孜撫以安靜首贊郡庠礮範金石創置大成樂
修城東隄三百餘丈周樹以柳舟航聚落隱爲一郡勝
槩會稽爲浙東壯縣日孜至驗糧賦爲高下仍歲籍之
使無竄易爲奸縣口食鹽課先時率侵於私鬻日孜設
法置局歲周課完無有侵漏山陰富室徐某嘗以私怨
殺人沈尸於海又讐異母弟誣以僞造楮幣而幽之使

不得自白推官貢師泰檄曰孜孜其狀收捕窮詰竟按其罪於是遠近震伏邑以大治始修孔子廟繼修夏禹廟修南鎮廟又修馬太守祠尋以母疾去官卒年四十

有四

劉職方集

聶以道吉水人官江華縣尹興學校勸農桑復流民三百戶墾良田千餘頃歸旁民詭寄徭徠不犯其境天歷中中書奏擬以爲武昌推官上曰此非不要錢聶以道邪在湖廣裁減歲制萬緡經歷海南北與監司力爭平湖書院不得爲老子宮又建議沒入命婦爲人妻孥非盛世事皆其實蹟云

人物志

龍雲從字子高永新人元末任福州儒學提舉時李一初文名爲世所重而雲從以詩歌與之韻頡鄉邑閒詩

人自吳萃樂外首推之

永新人物志

劉性字粹之廬陵人至順進士同知昌州改旌德縣尹有指枯木類人形者爲佛民間相聚拜禮性命昇至庭曰柴也命焚之後調鎮江未行召修宋遼金三史未成

卒

林志

胡希仁字時中吉水人授古田令有林晉者餽白金數百兩干薦剋希仁卻之不受平章燕友不花聞而美之曰子何減於楊震

林志

楊升雲字雲衢泰和人任貴溪縣丞張真人家恃寵驕恣爲民患升雲繩以法張喉當道誣謫之尋得白改判新淦扶善鋤奸不少挫捕得眞盜上司縱之遂棄官去

林志

李復登安福人至順進士爲江華尉修治學校立濂溪

祠取經史以化導之邑遂稱治

林志

陳植字中吉永豐人至順進士授翰林待制謫廣東博羅令歸建中山書院博覽載籍尤精春秋所注名玉鎖匙明永樂閒纂修五經學士金幼孜徵植所注纂入大

全

人物志

王充耘字與耕吉水人元統進士所著有書經管見四

書經疑行於世

人物志

李恕字省中廬陵人所著有易書詩孟子旁註諸書

物志

吳思尹字莘樂永新人登進士授永豐縣丞旣去民歌思之元季棄官歸徜徉山水閒賦詩自樂後進多師之

稱桂岡先生子孟勤仲謹能世其家

永新人物志

蕭文孫字煥有吉安人年十三喪父服除遊京師上救荒策於御史臺或欲引是以薦乃憮然曰吾豈以救荒書媒仕進哉以集賢學士王德淵薦起爲桃源州儒學教授遷臨江路總管府提控案牘新淦民李殺人驗者受賕益以疾乃移書摘其伏請改讞上下囊橐不省適監察御史行部至文孫白之受賕者始自首屬他官剖棺察之見其肋斷者四李伏罪罷官六人吏七人同列惡之在官十八月而去遷廣東道宣慰司都元帥府照磨會權臣枋國不用漢人爲幕長令下卽行久之調武岡新甯尹郡民唐訟仇家擅殺家奴毛棄之江屬他尸自上流漂至察其無殺傷痕不驗密令人生得毛於永

州之境乃抵唐罪莫不駭服以爲神綏甯尹頓使酒殺人郡檄新甯按之有以郡官意風使全其人奮然曰若然則初覆驗官俱當抵罪活一凶如死者何吾不忍爲也卽推驗其獄考爲湖南最嘗作忠孝二史經筵檢討危素言於朝以其書可備勸講會修宋史行省上其言史官稱爲纂述有體未及擢用而卒弟孚有以能詩聞

揭傒斯序其集

說學齋集

蕭泰登字則平泰和人廣東提刑僉事獠賊偪城眾惶懼失措泰登急上馬督捕獠遂遁去時安南久失藩臣禮奉詔往諭疑懼相半泰登喻以來意歸所盜地二百里奉表貢獻升廣西廉訪使陳便宜二十五事進南臺監察御史復言十事分按江浙卒於驛

人物志

歐陽弇字介仲廬陵人飭行修禮不專爲科舉之學所

著有鳳山集

林志

賀仲善永新人出宦族遘龍仁夫劉友益之門因以舊

宅建吉安詩人堂

永新人物志

劉楚蘭字芳叟泰和人父繩武宋亡隱居講學楚蘭其

長子也至元初舉茂材授建昌文學升吉水教諭以親

老辭祿歸養益肆力於學尤善易壘土結茅名玩易齋

其後攝鄉校凡親承議論者悉有宏益世稱深林先生

海桑集

賀仲英永新人至元末糾其族保捍閭里湖南洞獠來

攻邑城仲英斬其首二人賊復合他寇來徇境賈勇陷

陣死於邑之閭溪從子禮安追賊得其骸以歸

永新人物志

王子讓廬陵人工文章主之以仁義激之以忠憤不爲

詭說異詞其宗人名嘉言者亦以詩聞於時

林志

解子玉字成我年十三理家事如成人居喪無闕禮肆力於古學虞集歸自翰林或勸挾所業往見可借助聲名不從齋居玩心人莫窺其際來學者亦不拒教授桐江之上垂三十年中更亂離與人言惓惓忠義多所變

化人比之王烈王通云

春雨堂集

李天簾吉水人得劉靜修道學之傳有詩書經疏行世

人物志

高文鼎吉水人參廣東元帥府事薩都剡薦於朝授廣州同知尋升副元帥至正閒三山寇攻廣城文鼎以義激將士死守力拒幾一年援兵不至城陷遂自刎一家

皆死

吉州正氣錄

劉元謨吉水人爲弋陽知州至正間賊兵徧州元謨力拒凡十九日眾欲降元謨大罵曰雖死當殺此賊援兵

不至城陷罵賊而死

吉州正氣錄

周冕字時中廬陵人由文學宰廉山賀州洞寇周滿反兵不克曰除是周縣尹來卽降冕往寇望見卽羅拜後家食至正末兵起監郡納速兒丁起冕及前松江同知劉福領兵次龍湖寇至眾曰姑少退冕曰當死戰遂與福俱遇害

吉州正氣錄

楊介字公望景行子以蔭補清江縣簿時監州達爾瑪實哩原作達理馬識禮募兵保障辟介率兵民戍玉山介嚴約束以身先之寇不敢犯未幾陳友諒兵至下令錄寓官

以備用介言於眾曰苟有見汙辦一罵速死耳遁迹山

中鬱憤而死

人物志

曾貫字傳道泰和人紹興照磨監州辟禦龍泉寇戰於

觀背死之所著有周易變通四書類辯庸學標著

林

蕭生字彝翁吉水人幼孤事母以孝聞用御史薦爲建

昌州儒學正寇亂家居江西參政全子仁率師平袁州

辟生爲參謀會僞漢陷廬陵子仁遁去生歎曰有城不

守非忠也遇敵弗戰非勇也謀人軍而不死何面目見

天下士乎卽日投學中井不死爭出之三日不食爲書

付女夫羅岳并書衣帶曰男子之貞猶女之烈一有玷

焉萬善難雪竟赴井死郡人葬於讀書堂學之士女私

謚貞節

白志

謹案全子仁卽潘布阿咱爾原作全普庵撒里子仁其號也

王延字與齡廬陵人沂公會七世孫生平有逸趣自比葛天氏之民卜居豫章東湖上荷鋤經營析九區取嘉蔬藝之欣然自得識者咸以爲知道

宋濂翰苑別集

趙應祥廬陵人年十四其父行賈不還從父從北來知父已死卽辭母往求聞都下有曾老者與父善走數千里詢之知父殯濱州墓冢纍纍不可辨應祥行哭七日解髮繫馬鞍祝曰隨馬所之過吾父墳者當髮解鞍墮旣經一墳髮解鞍墮發之棺上具有父姓名遂脫衣裹其骨以歸

續宏簡錄

蕭同善萬安人任安慶路經歷元末奉郡辟攝本縣事龍泉彭時中寇縣治同善與其尉荆世傑集義士守禦後復來攻城陷同善督眾力戰被執賊脅其跪同善罵

曰我命官也何爲跪汝賊乃裂其喉而死

林志

陳新泰和人新淦州判既歸省監州達正道聞其賢辟守州之東境時援少食盡堅守不去未幾被執抗節死

之人物

志

劉福郭太俱吉水人福仕松江路同知太爲巡檢元末

寇起福以奉議統兵爲宣慰周冕援拒杭州白珏時郭

太設伏東向寇分隊出烏江

安志作東

河源冕軍翼擊之太

乘勝追擊獲其渠帥斬首數百級日曛寇尾襲冕軍太

又斃其先鋒福奮勇擊殺矢盡失援俱死之

林志

劉霖字雲章安福人幼從廩集學登進士無仕進意有

太極圖解動靜元渾歲會數原諸篇深有理致

林志

周霆震字亨遠安福人以先世居石門田西故又號石

田子科舉行再試不利杜門授經專意古文辭尤爲桂
隱申齋二劉所賞識晚遭至正之亂東西奔走詩多哀
愁之音洪武初卒門人私謚清節先生廬陵晏璧輯其
遺藁曰石初集張瑩爲之序

元詩
小序

楊允孚字和吉吉水人所著有灤京雜詠一百首邑人
羅大已序之曰楊君以布衣襖被歲走萬里窮西北之
勝凡山川物產典章風俗無不以詠歌紀之

元詩
小序

龍光庭吉水人來安縣主簿當淮南有警饋餉不乏兵
部尚書黃昭招撫江西以光庭參謀軍事首倡義士黃
子淵蕭景忠率眾禽賊首李彬一吉安遂平

林
志

唐術字景行永豐人博通經史刻志勵行從吳澄遊深
相契合至正庚寅中乙榜授宜春學諭元季兵亂術仗

義率眾以圖保障執於賊大罵不屈遂遇害

羅一峯集

郭鈺字彥章吉水人生當元季盛氣負奇明初以茂材徵不就所著名靜思集嘉靖間八世孫廷昭哀而刻之

經歷艱難流離之狀皆目見之可裨野史

羅文恭集

周鼎字仲恆其先自安成徙廬陵至鼎益自奮勵以場屋之業不足爲去從湜溪郭氏游湜溪名正表得靜春劉氏之傳實考亭之學也因與閩伊洛微旨四方執經者踵至年踰四十出遊江漢禮聘交費皆辭不受時天下承平鼎獨言大勢日趨於亂遂著濟時十二策及戰守之書數千言其後汝穎兵動江南受禍最酷一一如其言性嗜古文一洗宋季刻削纖弱之弊六經皆有論著未及完獨詩經辨正若干卷藏於家詩文曰貞一藁

其孟子管子商鞅諸論爲最偉云子愷字子諒明洪武

初進士

宋學士集

劉照更名永武字明道安福人常客游元都時方溺於承平權幸縱橫照私謁所親曰觀天時人事不久亂作矣卽束裝還以薦爲分宜縣尹母老辭不赴至正壬辰秋鄉人多挈家避匿照獨奮然傾貲召募壯勇數千人連營江上未幾羣寇併力來攻百計禦之郡城以安監司奏爲吉水州判以功升知州江西行中書省距吉安上下五百餘里惟照是倚孤軍血戰屢建奇功事聞擢吉安路總管僞漢陳友諒遣其將熊天瑞盛兵來寇與之力戰幾獲天瑞乙巳明太祖兵下吉按照終不屈已而病卒

春雨集

李廉字行簡安福人至正進士仕贛州路信豐縣令元季兵亂洞獠時出剽掠廉立伍保相守境以甯紅巾賊奄至以死守眾潰遇害其子敬嗣父官亦力戰死邑人爲立雙節祠

豫章書

郭彥章吉水人與劉桂隱劉申齋講學有詩名

府志

郭煥章吉水人以明經任隆興路儒學訓導至正間兵起州縣俱降煥章激烈自奮以石繫腰沈水而死門人

私諡曰文貞

吉州正氣錄

羅明遠名輝以字行廬陵人性倜儻聞寇將入境以義倡眾爲戰守備至正間吉安失守明遠率敢死士四百人巷戰城東殺寇數千明遠亦死焉郡立廟祀之吉安義士死寇者自明遠始

林志

楊本巖廬陵人元季爲白鹿書院山長遷廬陵主簿往捕東固寇盜乘勢深入死之子節聞父死與其徒鄒勝同赴敵死焉義士謝願賢入寇境收三人尸以歸吉州正氣錄

段所字原中永新人性峭直善詩隱居山中日吟咏自適人稱舫軒先生所著有鷺股集龍心源序之謂可追

李長吉云

永新人物志

陳無吝永豐人屢以尚書應舉不偶值元末兵亂叛賊強之從無吝答曰相從可矣乞與我紙筆乃大書一詩賊怒去其舌含糊罵不絕口而死吉州正氣錄

周元定吉水人以父蔭補官至婺州路通判元季紅巾寇起糾眾拒之力戰死林志

曾止善永豐人由儒士任石城尹紅巾盜起止善率兵

拒敵被執窘辱備至不屈死之

贛州府志

康震字宗武泰和人嘗從吳澄劉岳申學湖廣左丞吳
常薦爲慶陽州書院山長秩滿當遷以親老歸作莊山
書院招延學者館教之元季監州與定議爲守備計城
得完未幾熊天瑞入寇陞山中不食而死有思治集藏

於家

林志

彭文遠繼炎孫至正閒徐壽輝破袁瑞臨江攻吉安行
省命萬戶張祥守龍泉辟文遠爲護民巡檢寇逼城張
夜遁文遠留之不可因與偕行至螺灘追騎及之被禽
其從弟大遠奪賊馬奔還請兵會風雨大作亦爲賊所
禽與文遠及舉家十九人同日死

林志

鄧椿吉水人爲臨江府吏僞漢陷臨江椿集義士偕萬

夫長楊璣等與敵大戰城下三日兵潰投江死

林志

張心禹吉水人元末盜起趙州知州劉震奉郡檄禦之

震命其子孟初同心禹率眾直搗其穴乘勝深入伏發

孟初全軍陷沒心禹顧其子晉民曰父子同以義死復

何憾亦俱死之

林志

鄭作成廬陵人安成巨寇將迫境作成獨以義激保障

者境賴以全獻俘於監郡納速丁兒監郡喜曰得義士

如鄭君數輩吾何憂紅巾哉

林志

劉明道吉水人元末紅巾四起明道揭白巾爲號與賊

百戰不靡行省移文褒之曰堂堂巨鎮不戰而降小小

灘頭乃能仗義灘頭明道里也

林志

劉雯字漢章安福人會淮賊據安成雯起兵復州治至冬假行軍鎮撫出兵援分宜官軍戰敗悉逃雯單騎冒

陣死

府志

劉宗權廬陵人紅巾亂郡察知宗權有義檄守永福膏澤等鄉賊畏後躡不敢越境以暴廬陵偏郡城賴保障者五年賊甚患之逮移壘玉城有鄉人引賊據山麓泉令不得汲及計窮宗權率眾出壘力戰敗賊穴箕加宗權頸火之子朋遠從子如初俱以抗言死如初妻彭以不辱死劉晴川魁題其死義傳後曰不知時有地方之責者果皆終不死邪視宗權父子如初夫婦何如也

吉州

正氣錄

章善字立賢龍泉人性耿介尚氣急義讀書至古忠義

士輒撫卷太息至正壬辰東南盜起龍泉居萬山閒又
聯絡郴潭贛庾之境不逞煽妖尤甚善憂之奉其親入
城爲自保計有諤勒哲特穆爾原作完者帖穆者需次家居省
府署攝縣事善往見爲陳說古忠義事諤勒哲特穆爾
亦自以世受國恩又先人墳墓所在誓死守不去明年
春寇攻圍益蹙城中糧盡且數月猶拒守不下一日山
水暴至諤勒哲特穆爾挈妻孥乘小舸宵遁城遂陷善
舉室嘗自誓脫有急必死不苟活也至是善之父士壁
年八十餘矣先自投北江其妻李氏與其子婦亦相挽
赴井以死善聞之卽與其子煥臨江水訣曰汝年小宜
急去爲宗祀計勿我顧言已輒自赴煥號呼不能止亦
繼投之煥衣裙猶漂浮波閒未遂沒會甘竹人以筏來

救之免焉初善從前進士吳浩授禮經去場屋爲古文
詩歌以自見揭傒斯謂其辭舂容爾雅一洗近代之陋
嘗於所居營釣舫齋因自號楚江釣者學者稱之爲楚

江先生云

劉職方集

楊天與字與可泰和人族蕃且富天與兄弟俱文而貧
頽然長身幅巾衣履非弔喪問疾不出門日取書懷袖
閒吟誦而樂之無飢寒之色性嗜酒不能常得歲授徒
里中諸生多爲致之每旦坐堂上諸生執業以次進善
爲講說旨義各得其所通者精易卜時爲人決出處得
失進退如響而不爲譏祥變怪之說其義止於玩文審
象而已爲詩文率口占以授意到或自書之口無滯詞
筆不停綴然不喜著藁故多不傳卒年六十三

劉職方集

彭寶林廬陵人慷慨雄傑元季集鄉兵破走蘄寇復吉安城功第一授水軍萬戶父源竭家貲給餉將兵勤王日費千金未嘗吝惜壬寅寶林知事不可爲取所授虎符北面再拜焚之慟哭欲死旣念其父年九十餘未忍決絕遂杜門不出而終子志道代父領其眾附明從常遇春下贛與朱文正守江西有功不言賞亦自免歸

解學

士彭氏
族譜序

劉中孚字志行吉水人舉茂異至正閒任南雄推官用刑平恕囹圄常空部校與富民徐氏有隙誣以反逆繫獄三十人中孚錄囚得其情平反之湖寇圍城十餘日散帑金率子弟及部民守北門寇不得逞比再至勢益張長官欲降中孚曰吾頭可斷不可降也卒莫能強後

知英德州以完城功擢肇慶總管辭不就

廣東通志

湯德明永新人五歲喪父元末僞相周安據永新明兵下邑德明同母劉氏隨軍入袁州指揮章富家富調守遼東德明從行遂失母所在旦夕號慟額禱富憐之乃資遣俾還袁州袁人無識者歸永新問之母依親調鳳陽比至所親又調護衛北平乃復徒步追求之竟得焉母子不相見三十年德明迄全其養劉年八十五乃卒

安志 謝志舊案湯德明白志不載今補同時尚有永豐鍾慶宗泰和楊美曾源友鄒學詩吉水錢尚德胡榮祖安福劉豐樂俱以孝義見安志今附姓名於此

四

江西通志卷一百四十六